

CÁTEI LÉ BURI LARÚFUDUBEI BÚNGIU LUN JUAN

Cátei arúfudúati buri lun Jesucrístu

¹ Niján buri cátei le larúfudubei Búngiu lun Jesucrístu lun lasúbudiragüdüni joun lánigu cátei lé buri lúnbei lasúseredun madíse. Subúdigüda láali Jesucrístu cátei le lun Juan le esériwidubei lun, láu loúnajani láni ánjeli lúmoun lun larúfuduni lun. ² Aríñaga láali Juan inárüni luágu sun le laríjubei, geféenti luágu láni Búngiu ugánu lúma luágu le aríñaga láalibei Jesucrístu.

³ Gúndaatiña gürígia ja alíjabalin jáma ja agáambubalin laliijóun ugánu le, le erésibirúabei lúmagiñe Búngiu, adúga jagía gásu láu cátei le bürúwañubei ya, ladúga yaráfaali dan lun lasúseredun.

Labúrüjan Juan joun tílana sédügubei ligílisi

⁴ Áu Juan, nabúrüjaña joun tílana sédü ligílisi to Ási-aboun. Resíbi jumá abíniruni lúma darángilaü lúmagiñe Búngiu le wínwanbei lúmagiñe lubáragiñe furúmiñeti dan, wínwan ligía guetó, wínwan ligíame sun dan. Resíbi jumá giñe abíniruni lúma darángilaü jámagiñe sédü espíritu ja ligíbugiñebaña lála, ⁵ lúma lúmagiñe Jesucrístu le aríñagubalin cátei le inárüti, le furúmiñebelei ásaaruti lídaangiñe ouweni áni gabáfu ligía jawágu urúeigu ja ubouagubaña. Jínsiñetiwa lun Crístu, áni chibá laadiwa lídaangiñe wafígoun láu líta, ⁶ adúga láadiwa urúeigumé lúma fádírigumé lun wesériwidun lun Lubúngiute, le méme Lúguchibei. ¡Rúalá uweíriguni lúma ubáfu lun, lun súnwandan! Ítaralá.

⁷ ¡Aríja jumá, liábinba Crístu juánriñurugu, jaríjubei sun gürígia ásta gíñe ja áfarubalin! Jayájuba sun gürígia ja ubouágubaña dánme le jaríjini luágu wuríbani le adúga jamáalibei. Ítara lúba.

⁸ “Áu lagúmesejabei sun cátei, áu lagúmuchagülebei, quei létüra ‘A’ lúma ‘Z’ ”, líña laríñagun Búngiu le Súnti Gabáfu, le wínwanbei lúmagiñe lubáragiñe furúmiñeti dan, wínwan ligía guetó, wínwan ligíame sun dan.

Layáwadagun Crístu lun Juan

⁹ Áu Juan, jidúje lueígiñe Jesucrístu áu, gafánraantina júma lídan larúeijan Búngiu, súfurijadina úara júma luágu Crístu, resbíjadina gíñe gurásu lúmagiñe Crístu. Reídeitina adaürúwa luágu ubóju le gíribei Pátmos lueígiñe napúrichijani Lerérun Búngiu, lúma lueígiñe napúrichijan luágu Jesucrístu. ¹⁰ Luágu ában wéyu dimáasu, ába neréderun lábugiñe lubáfu Sífiri Sándu, ába nagáambun ában umálali reínti nanágangiñe quei lumálali fidu, ¹¹ laríñaga umálali ligía nun.

—Áu furúmiñebei lúma agúmujóuni, quei létüra ‘A’ lúma ‘Z’. Abüríjabeí sun le baríjubei, ábame bouñajanun gárada tugúya joun tílana sédü liglísi to louábawaguboun Ásia. Éfeso, Esmírna, Pérgamo, Tiatíra, Sárdis, Filadélfia lúma Laodicéa.

¹² Ába nagáragun lun naríjin ca lan adímurejabei nun, ába naríjin sédü lébu sanúdelu gólu, ¹³ labádinagua sédü lébu sanúdelu ligía ába naríjin ában camá jamuga Wügúri Garaúwarügüti —le Jesucrístubei—táu ában anáanguni chÜlútu luágun lugúdi, lúma ában béliiti gólu yaráfa lun laníguagu. ¹⁴ Jarúti lídiburi quei líyu mudún, quei móuru, ítara líña lágu quei wátu geméti. ¹⁵ Miríti lugúdi quei brónse le írichawagúaaali, le dáwaali lídoun órno, reínti

lumálali quei lireín leíbaagun sarágu dúna. ¹⁶ Níñanu sédü warúguma lídan lújabu le loúnwenren, níñoun ában efeín gágiritu liyúmulugugiñe, biángua tamána. Ítara líña ligíbu quei wéyu dan le lásüdün láu sun lére.

¹⁷ Dan naríjinbalin, ába náburujan lubádu lugúdi camá jiláadina. Ába líchuguni lújabu le loúnwenren nuágu, ába laríñagun nun.

—Manúfudedaguabá, áu le lagúmesejabei sun cátei, áu lagúmuchaja. ¹⁸ Áu le wínwanbei, jilátina, guetó wínwantina lun sun dan. Níjein ligélen ouweni núma, lúma ligélen fulásu le ní jabei jiláguaaña. ¹⁹ Abúrújabei lubeíti le baríjubei, le guetóbei lúma le lúnbei liábin. ²⁰ Niján laníchigubei jawáguti sédü warúguma ja baríjubaña lídan nújabu le noúnwenren, lúma sédü lébu sanúdelu gólu. sédü warúguma, jagía sédü jouniri tílana sédü ligílisi, sédüti lébu sanúdelu, jagía sédü ligílisi.

2

Ugánu joun tílana sédü ligílisi. Ugánu joun tílana ligílisi Éfeso

¹ ‘Babúrúja lun jouniri tílana ligílisi to Éfesoboun, baríñagame lun lun laríñagun joun gürígia jagía. “Ítara líña naríñagun, áu le jáubei sédü warúguma lídan nújabu le noúnwenren, le giñe eíbugubei labádinagua sédü lébu sanúdelu le gólu. ² Subúdi numúti sun le jadúgübei, subúdi numúti lidére juwádigimari lúma jagúraasun, áni subúdi numúti luágu siñá lan jáfaguniña ja wuríbabaña. Subúdi numúti luágu jouchagua jumáaña lan ja aríñagubaña luágu apóstolugu jamá áni máma apóstolugu jagía, áni darí jumaali luágu ye jamá. ³ Gagúraasunjadün, áni súfuri jugúya sarágu lídan juwádigimari nuágu, mabúcharunga

juágu. ⁴ Láu sun líra, níjein ában cátei jadúga magúndaantina láu. maweírinjali nínsiñe jun queí meja furúmiñe. ⁵ Ligía lubeíti, jarítagua jumá ída jíña lán meja, sáansi jumeí jigáburí, adúga jumeí cátei lé meja jadúgübei furúmiñe. Ánjein madúgün jumá ítara, nídinba juágu furése, ábame nagídaruni lébu jisáandelun lídaangiñe lufúlasun, ábame mámaadün lan tílana nilgílisin, ánjein gubeírügü jasáansira jigáburí, ligíaba madúgün náni ítara. ⁶ Láu sun líra, luáguñein jáni fuleísei, liyéreegun cátei lé buri jarúfudajabei nicoláitagu jun lúma buri cátei le jadúgübei, le gíñe iyéreegubei nun. ⁷ Le garígeirugubei lun lagáambun, agáambaleí le laríñagubei Sífiri Sándu joun tílana buri ligílisi. Ja ásiiragúbalin wuríbani, neígagüdübaña lídaangiñe lin tídibu wéwe to lánina ibágari, to lufúlasunruguboun Búngiu.”

Ugánu joun tílana ligílisi to Esmírnaboun

⁸ ‘Babúrúja lun jóuniri tílana ligílisi to Esmírnaboun, baríñagame lun lun laríñaguni joun gürígia jagía. “Ítara líña naríñagun, áu le furúmiñeti lúma agúmujóuni, lé meja ouwebei áni wínwanyaali. ⁹ Subúdi numúti sun le jadúgübei, subúdi numúti jasúfurirun lúma jugúdeme, láu sun lídan lan linárün cátei, rísi jumá. Subúdi numúti gíñe luágu adímureja jamá ja aríñagubaña luágu juríu jamá wuríbati juágu, máma ámu cátei jagía lueídügüya lánigu jamá Máfia. ¹⁰ Manúfude jumá lueí le lúnbei jasúfuriruni, ládaraguba Máfia fiú jídaangiñe furisunrugun lun louchwagúniwa jaffñen sun jugúya, áni jasúfuriruba sarágu luágu díisi wéyu. Derégüdagu jumá lídan jaffñen nuágu darí jóunwen, ábame níchuguni ibágari magúmuchaditi jun, jafáyeiruájame. ¹¹ Le garígeirugubei lun lagáambun, agáambaleí le laríñagubei Sífiri Sándu jóun

buri tílana ligílisi. Ja ásiiragúbalin wuríbani, másügürünbaña lídaangiñe libíaman óuweni.”

Ugánu joun tílana ligílisi to Pérgamoboun

¹² ‘Babúrüja lun jouniri tílana ligílisi to Pérgamoboun, baríñagame lun lun laríñagun joun güri-gia jagía. “Ítara líña naríñagun, áu le gámabarun efeín to gágiriboun, to biánguaboun amána. ¹³ Subúdi numúti sun le jadúgübei, subúdi numúti gíñe luágu Máfia lántima gabáfubei jádan güri-gia ja ñí lubei jagánawa, áni láu sun líra, númamemeñadün. Mígirun jumágili jafíñen nuágu, ni íbini lídan dan le láfarúnbei Antipás le geféenbei buíti nuágu ñi lídan fulásu le ñí jubei, le ñí lubei lagúmadija Máfia. ¹⁴ Láu sun líra, níjein buri cátei jadúga, magúndaantina láu. luágu añájein lan fiú güri-gia júma yára Pérgamo ja májabaña jígiruni cátei lé meja larúfudajabei Baláam, le íchugubei dimúrei lun Balác lun lafígoungüdüniña Isra-elítagu láu jeigin eígini le adágarawagüdúti joun sándu, lúma láu jabágaridun lídan salúfuri. ¹⁵ Ítara méme gíñe, añájein ja májabaña jígiruni cátei lé buri jarúfudajabei nicoláitagu júma ñi, cátei le iyéreegubei nun. ¹⁶ Ligía, sáansi jumeí lubeí jigáburí, ánjein madúgün jumá ítara, nídiba juágu madíse, ábame nageíndagun jáma güri-gia ja adúgübalin cátei buri le, táu efeín to áfuriduboun niyúmulugugiñe. ¹⁷ Le garígeirugubei lun lagáambun, agáambaleí le laríñagubei Sífiri Sándu joun buri tílana ligílisi. Le ásiiraguti luágu wuríbani, neígagüdüba lídaangiñe maná le arámudúañubei lun lun líchugun érei tun luwáni, ábame níchugun ában dúbü jarúti lun láu ában íri iséri búrúwañu luágu le ibídiñeti ni ca un lueídügüya lun le erésibirubalin.”

Ugánu joun tílana ligílisi to Tiatíraboun

¹⁸ ‘Babúrüja lun jóúniri tilana ligílisi to Tiatíraboun, bariñagame lun lun lariñagun joun güriúa jagía. “Ítara líña nariñagun, áu le Liraú Búngiu, le ítarabei águu quei wátu geméti, liábin lugúdi quei brónse le írichawagúaaali. ¹⁹ Subúdi numúti sun le jadúgübei, subúdi numúti jísíñe-jabu, jafíñen, jesériwidun láu jugúraasun, subúdi numúti gíñe luágu jadúgüña lan cátei buíti guetó lueí meja furúmiñe. ²⁰ Láu sun líra, níjein ában cátei jadúga magúndaantina láu. Jígirunun Jezabél to aríñaguboun luágu proféta tan áni máma líña, lun teyéeduniña güriúa láu tarúfudajan joun nánigu lun jaganoún lídan salúfuri lúma lun jeigin eígini le adágarawagüdúti joun sándu. ²¹ Rújadina dan tun lun tasáansiruni tigáburi, májagiru tígiruni tisálufurin. ²² Ninárün jáu luágu náburugüdaaru lan láu sándi lun jasúfurirun ja adáagubaña salúfuri túma ánjein mígirun jamá jadáaguni cátei lé buri tadáagubei, ²³ ábame náfaraguniña tirájüñü jilágubei, ítara lúba jasúbudiruni sun nánigu luágu subúdi náni lében aríttaguni lúma tében anígi, ábame nafáyeiruni cára ában jídaangiñe según le ladúgübei. ²⁴ Ja jíbiri ja Tiatírabaña, ja mafálarubalin arúfudajani ligía, machúlügiña gíñe asúbudirei le únbei jagúara lujúlilin láni Máfia cátei le arámudaguabei, míchubadina ámu anúgüni jawágu. ²⁵ Ragújumei lubuídun jigáburi darí niábin. ²⁶ Ja ásiiragúbalin wuríbani, adúga méme jameíme le nabúseerúbei ladügún darí lun jóúnwen, níchuguba ubáfu joun luágu buri fulásu, ²⁷ ítara quei líchugun Núguchi Búngiu ubáfu nun. Ábame jedéraagüdüni jagúmadiruni fulásu buri quei láu ában murúsun gürábu, ábame jamúrugudaguni wuríbani queísi soúdiéru le láuti múa. ²⁸ Níchuguboun gíñe warúguma to lánina bináafin

joun. ²⁹ Le garígeirugubei lun lagáambun, agáambaleí le laríñagubei Sífiri Sándu jóún buri tílana ligílisi.”

3

Ugánu joun tílana ligílisi to Sárdisboun

¹ ‘Babúrüja lun jóúniri tílana ligílisi to Sárdisboun, bariñagame lun lun laríñagun joun. “Ítara líña naríñagun, áu le jáubei sédü espíritu lání Búngiu jáma sédü warúguma. Subúdi numúti sun le jadúgübei, subúdi numúti luágu jiláñu jíña lan lún buri cátei le nuáguti, láu sun aríñawagúa lan luágu wínwan jumá. ² Agágudúa jumá, rújuma érei lún buri cátei le níjeinguabei, lubáragiñe loúnwen, aríja náali luágu múaran lan le jadúgübei ligíbugiñe Búngiu. ³ Jarítagua jumeí lubeíti le arúfudajóubei jun, falájumei, sáansi jumeíme jigáburi. Ánjaün magágudun, nídiba juágu quei liábin ában jíweruti ibídiñoun óra jun. ⁴ Láu sun líra, añájein fiú gürígia jagánagua ñi Sárdis ja múaradungiñábaña lúma wuríbani, jagía jeíbuguba núma táu anáanguni jarútu ladúga yúuti joun. ⁵ Ja ásiiragúbalin wuríbani, jadáuraguba anáanguni jarútu, áni magídarun nubeí jíri tídaangiñe líburu to gáubalin jíri ja lúnbaña jabíjini ibágari magúmuchaditi, arúfudarügü nubáña quei nánigu ligíbugiñe Núguchi Búngiu lúma jagíbugiñe lání ánjeligu. ⁶ Le garígeiruguti lun lagáambun, agáambaleí le laríñagubei Sífiri Sándu joun tílana buri ligílisi.”

Ugánu joun tílana ligílisi to Filadélfiaboun

⁷ ‘Babúrüja lun jóúniri tílana ligílisi to Filadélfiaboun bariñagame lun lun laríñagun joun. “Ítara líña naríñagun, áu le sándubei, le gíñe inárünibei, le gámabalin

ligélen urúei Davíd, le úabei ni ában gayáraati ladáuruni le nánjunrenchubei, siñá lánjunrenchuni ni ában le nadáurubei. ⁸ Subúdi numúti sun le jadúgübei. Rújadina ában béna júnren jigíbugiñe le lásiñerun ni ában adáura, ladúga láu sun loúgua lan jére, adúgaadün gásu láu nugúmadin, áni meyéeraguntün luágu nánigu jumá. ⁹ Aríja jumá, nadúgüba lun jayábin lánigu Máfia ja yéebaña, ja aríñagubaña luágu juríu jamá áni mabágariduntiña queísi lánigu Búngiu, ábame nájuduraguagüdüniña jigíbugiñe lun jasúbudiruni luágu jugúya lan numütuniñabaña jínsiñetiña nun, ninárün jáu. ¹⁰ Areída jumáli nugúmadin lun gagúraasun jumá, ligía nareídubadün lubeí lueí lidáani oúchawagúni le lúnbei liábin luágu sun ubouú lun jouchúniwa sun ja ubouágubaña. ¹¹ Madísebei niábin, mígira jumeí ni ában lun lagídaruni jafíñen nuágu, meféridirun jumámuga ni cátei lídaangiñe le lúnbei níchuguni jun. ¹² Ja ásiiragúbalin wuríbani, níchugubaña quei wagábu tídan Lúban Nubúngiute, máfuridundügüyaañame ñígiñe, ábame nabúrüdüni líri Nubúngiute jawágu lun lasúbudirúniwa luágu lánigu jamá, luma líri ubúrugú le lání Nubúngiute, le iséri Jerusalén le ñúbinbei siélugiñe lúmagiñe Nubúngiute, nabúrüdübei gíñe iséri níri jawágu. ¹³ Le garígeiruguti lun lagáambun, agáambaleí le laríñagubei Sífiri Sándu jóun buri tílana ligílisi.”

Ugánu joun tílana ligílisi to Laodicéaboun

¹⁴ ‘Babúrúja lun jóuniri tílana ligílisi to Laodicéaboun, baríñagame lun lun laríñagun joun. “Ítara líña naríñagun, áu le inárünibeí, le gaféenbeí buídu, le aríñagubalin inárüni, le ídaangiñebeí liábin sun cátei le ladúgübei Búngiu. ¹⁵ Subúdi numúti sun le jadúgübei, subúdi numúti

luágu madfli jumá lídan jesériwidun nun, másü jugúya. ¡Dilígubeijadün jamúga o sújuma! ¹⁶ Quei bachárügü jubeí, madlilitün, másü, newérebadiün niyúmulugugiñe. ¹⁷ Aríñagatün luágu rísi jumá, luágu buídu lan dan jun, luágu memégeirun jumá ni cáta, áni maríjin jumúti luágu fugiábu jumá, gudémetün, maríjintün, surúsu jíña. ¹⁸ Ligía níchugunbei dimúrei jun lun jagáñijan gólu le afínjuúaaali láu wátu geméti númagiñe, lun rísi jumá le tímatimaati, lun gíñe jagáñijan anáanguni jarútu núma lun jadáuragun láu jasúrusujan, lúma árani lun jíchuguni lídoun jágu lun jaríjin. ¹⁹ Ébecha numútiña ja jínsiñebaña nun láu idérei, arúfudaja áu joun. Lúnti lubeíti sériu jumá, sáansi jumeíme jigáburi. ²⁰ Anája bénabu, nagúajaña, le agáambuti numálali, ába lánjunrenchuni béna nubá, nebéluruba lúmoun, ábame neígin lúma, jou ligíame núma. ²¹ Ja ásiiragúbalin wuríbani, níchuguba ubáraü joun númagua luágu nála le lála urúei, ítara quei násiiraguni wuríbani, ába nañúurun lúma Núguchi luágu lála. ²² Le garígeiruguti lun lagáambun, agáambaleí le laríñagubei Sífiri Sándu joun tílana buri ligílisi.”

4

Ájuduraguni lun Búngiu, siélu

¹ Lárigiñe sun cátei le, ába naríjin ában béna júnren siélu, liábinti umálali le ítarabei quei lumálali fídu, lé buga adímurejabei nun, ába laríñagun nun.

—Weínba ñájoun, narúfudaali cátei lé buri lúnbei lasúseredun lárigiñe buri le bun.

² Lídan óra ligía, ába neréderun lábugiñe lubáfu Sífiri Sándu, ába naríjin ában lála urúei siélu láu Búngiu ñun luágu. ³ Ítara líña camá ában dúbü miríti, le jáspe o cornalína, ñíñoun ában jerémuuru geyégu láu jalaú

ligía, mirítu quei ában dúbü le esmerálda. ⁴ Geyégu láu lála urúei ligía aríjayatina ában wein-gádürü lála urúei, ñññanu weín-gádürü gürígia ja weírigutiña ñun luágu, táu jadáüragun jarútu lúma rídi gólu jábulugu. ⁵ Lueígiñe lála Búngiu ligía áfurijati labírijanouga lúma wayújururu, ligíbugiñe lála, ñññein sédü lámpu geméñu, jagía sédü láni Búngiu Espíritugu. ⁶ Ñññein gíñe ában cátei ligíbugiñe lála camúga ában barána le láuti bídiriu jarúgoungati.

Lamídaangua, geyégua láu lála Búngiu, ñññanu gádürü cátaña gabágaritiña buin láu águu, dándu jagíbugiñe quei janágangiñe. ⁷ Le furúmiñeti jádaangiñe, ítara líña quei ában liñún, le jabíaman, ítara líña quei ában bágasu wügúri, le jürüwan, ítara líña ligíbu quei ligíbu ában wügúri, le jagádürün, ítara líña quei ában ágila ájamajatu. ⁸ Gádürügubei jagía, sísiñein arúnaü luágu cáda ában jádaangiñe, buin jáña láu águu jawágu, dándu bougudigiñe quei múnadagiñe jabíti, wéyuagu áriebu jáu agúaraja.

Sáñdu, sáñdu, sáñdu,
Wabúreme Búngiu, le Súnti Gabáfu,
le wíwanbei lúmagiñe lubáragiñe furúmiñeti dan, wíwan ligía guetó, wíwan ligíame sun dan.

⁹ Sáñgüti jíchugun cátaña gabágaritiña ja inébesei lúma eteíngiruni lun Búngiu le ñññbei luágu lála, le gabágaribei lun sun dan, ¹⁰ ábaja jájuduragun wein-gádürü weíyaaña mútu jagía ligíbugiñe, ába jarúfuduni jínsiñejabu lun Búngiu le gabágaribei lun sun dan, ába jíchuguni jarídin ligíbugiñe, ába jagúarajan.

¹¹ Wabúreme, Wabúngiute, garíchatibu lun berésibiruni uweíriguni, inébesei, lúma ubáfu,
ladúga Amúrü adúgübalin sun cátei,
láu bugúndan badúgei, láu gíñe bugúndan níjein lubeí sun le níjeinbei.

5

Líburu lúma Mudún

¹ Ábati naríjin ában líburu lújaburugu Búngiu le ñúnbei luágu lála, abúrújouatu líburu tugúya turágeirugu lúma tigíbuagu, darúatu láu sédü séyu. ² Ába naríjin ában ánjeli gabáfuti, ába lálügüdajan láu umálali reínti.

—¿Ca garíchabei lun ladáranunun líburu lúma lun lajeíridunun tiséyun?

³ Úati ni ában garíchatí lun ladáranunun líburu tugúya, ni íbini lun laríjin tuágun, ni siélu, ni múarugu, ni lábugiñe múa, úati ni ában garíchatí. ⁴ Ába nayájun sarágu ladúga úa lan ni ában garíchatí lun ladáranunun líburu tugúya, ni lun lalíjanun, ni íbini lun laríjinun. ⁵ Ábati laríñagun ában jádaangiñe weíyaaña mútu nun.

—Jebé bayájun, ladúga Jesucrístu, le “liñún” le jádaangiñebéi ladúgawagun Judá, le linébaanfan urúei Davíd, sirígua láali wuríbani lun gayára lan ladáranunun líburu lúma lun lajeíriduni sédü tiséyun.

⁶ Lamídaanguati lála Búngiu jáma gádürü cátaña gabágaritiña jagía jáma weíyaaña mútu jagía, ába naríjin ában Mudún rára, camá jamuga áfarúali. Sédüñein ligáanchun, sédü lágu, águu buri ligía, lání Búngiu sédü Espíritugu ja ónajoúbaña lídoun sun ubou. ⁷ Nñíbinti Mudún ligía, le Jesucrístubei, ába lanúgünun líburu tugúya lújaburugugiñe Búngiu. ⁸ Dan le lárügüdünbarun líburu, ába jájuduragun gádürü cátaña gabágaritiña jagía jáma wein-gádürü weíyaaña mútu jagía ligíbugiñe. Cáda ában jádaangiñe weíyaaña mútu jagía, ñíñoun ában gidára lúma, lúma cópu le gólu buin láu cupáli, le liyáwabei jayúmuragun lánigu Búngiu. ⁹ Niján urému iséri le jerémujabei.

Garíchatibu lun banúgünun líburu, lun bajeíridunun
tiséyun,
ladúga áfarúa ban, ába bagáñijaniña gürígia lídaangiñe
sun rása, sun luwúyeri dimúrei, fulásu lúma
néchaani.

¹⁰ Adúga báña urúeigumé jáma fádirigumé
lun jesériwidun lun Wabúngiute,
lúma lun jagúmadijan ubouágu.

¹¹ Lídan le nariágun, ába nagáambuni jamálali sarágu
ánjeligu geyégu láu lála lúma geyégu jáu cátaña gabá-
garitiña jagía, jáma weíyaaña mútu jagía. Níñanu míñun
míñun ánjeligu, ¹² jaríñaga láu umálali jéreti.

Yúuti ubáfu lúma írsini, subúdi lúma érei,
uweíriguni lúma inébesei, lúma eteingiruni lun Jesu-
crístu, Mudún le áfarúbei.

¹³ Agáamba numúti gíñe jaríñaguni sun cátei le
ladúgübei Búngiu siélu, le múarugubei, le lábugiñebei
múa, lúma le baránajabei, lúma sun cátei lé buri lídaanbei.
Rúalá eteingiruni, inébesei, uweíriguni, lúma ubáfu
lun Búngiu le ñúnbei luágu lála,
lúma lun Mudún, lun sun dan.

¹⁴ Ába jaríñagun gádürü cátaña gabágaritiña jagía.
—¡Ítaralá!

Ába jájuduragun wein-gádürü weíyaaña mútu jagía
ligíbugiñe le gabágaribei lun sun dan.

6

To sédü séyu

¹ Ábati naríjin dan le lajeíridúnbarun Mudún
furúmiñetu tídaangiñe sédü séyu tugúya, ába nagáambun
laríñagun ában jádaangiñe cátaña gabágaritiña jagía láu
ában umálali camá lumálali wayújururu.

—¡Jigábu baríja!

² Ába naríjin ában gabáyu jarúti, le waríñubei luágu, ñíñoun ában árcó lújaburugu to áuboun lageíndagua. Rúati ában rídi lánina ásiiraguni lun ladúga lúnbei lan lagáñeiruniña láganiñu. Furíti ageíndagua, ába lásiiragun lídan sun cátei.

³ Dan lajeíridunbarun Mudún tibíaman séyu, ába nagáambun laríñagun jabíaman cátaña gabágaritiña jagía.

—¡Jigábu baríja!

⁴ Ába láfuridun ában gabáyu funáti, ába líchugúniwa ubáfu lun le waríñubei luágu gabáyu ligía lun lagídaruni darángilaü ubouáugugiñe, lúma lun láfaraguágüdüniña wügúriña jámagua jilágubei, ába tíchugún ában oúnwembun efeín lun.

⁵ Dan lajeíridúnbarun Mudún túrüwan séyu, ába nagáambun laríñagun júrüwan cátaña gabágaritiña jagía.

—¡Jigábu baríja!

Ába naríjin ában gabáyu wuríti, ñíñein ában baláansu lújaburugu le waríñubei luágu. ⁶ Ába nagáambun laríñagun ában umálali jamídaanguágiñe cátaña gabágaritiña jagía.

—Ábanrügülá kílo türígu luágu lebégi ában wéyu wadágimanu, úrüwa kílo sebáda ligía méme ebégi, áni toúnigi jumeíme aili lúma bínu buídu.

⁷ Dan lajeíridúnbarun Mudún tigádürün séyu, ába nagáambun laríñagun jagádürün cátaña gabágaritiña jagía.

—¡Jigábu baríja!

⁸ Ába naríjin ában gabáyu amaríyu, le waríñubei luágu, ouweni líribei, lárigi lárigi liábin jafúlasun jiláaña. Ába libíjin ubáfu luágu ligádürün murúsun lídaangiñe ubouú

APOCALIPSIS 6:9 14 APOCALIPSIS 6:17

lun láfarajan láu wuríbu, láu ilámaü, láu sándi, lúma jáu anímaalugu janárimetiña ja uboúagubaña.

⁹ Dan lajeíridúnbarun Mudún tiseíngün séyu, ába naríjinun jawáni ja áfarawagúbaña lueígiñe japúrichijani Lerérun Búngiu, lúma luágu jadímurejan buíti luágu Jesucrístu, lábugiñeñanu latáriü. ¹⁰ Jaríñaga láu umálali jéreti.

—¿Darísan ídame, Wabúreme le gúnfuliti láu lerérun, darísan ídame bagúseragüdaña ja mísiñejabúbaña bun uboúagu, luágu wounwen? ¿Ídamésan bafáyeigüdaña luágu jáfaruniwa jilágubei?

¹¹ Ába jabíjin anáanguni jarútu, ába laríñawagún joun lun jeméraagun luágu murúsun dan darí joustarun jabíriña lídan esériwiduni lun Crístu ja lúngiñabaña jáfarawagúniwa quei jagía.

¹² Lídan le naríjinbei, ába lajeíridunun Mudún tisisin séyu, ába ladágarun ában oúnwenbun járabaganáli. Ába láuridun wéyu quei lúdu, ába láfunadun játi camá jítaü, ¹³ ába jeíguadun warúguma ja siélubaña lun múarugun quei táburujan mángu tueígiñe tídibu dan le lánjingichunun garábali. ¹⁴ Ába lagúmuchagun siélu quei ában gárada dan le tabáruchawagún, ába ladíñuragunga sun wúbü lúma uboúju lídáangiñe jabára. ¹⁵ Ába jarámudagun urúeigu ja lánina uboú lídan júyu lúma buri labádinagua dúbü le luágubei wúbü, úara jáma ja weírigubaña, gurúnelugu, rísitiña, gabáfutiña, jáma sun idámuni, jáma wügúriña ja mabúremetiña. ¹⁶ Jaríñagati lun wúbü lúma lun dúbü.

—Jeígua jumá wawágun, arámuda jumáwa lueí laríjin Búngiu le ñúnbei luágu lála, lúma lueí lanárime ligáñi Mudún.

¹⁷ Chülújali weíríti wéyu le lúnbei larúfuduni Búngiu ligáñi. ¿Cábasan gayára lawánduni?

Seíni jawáguti Israelítagu

7

¹ Lárigiñe sun cátei le, ába naríjin gádürü ánjeligu rára luágu gádürü larígei uboú, ágüdaajei gádürügubei garábali lun máfurun lan ni murúsun luágun múa, ni luágun barána, ni luágun ni ában tídibu wéwe. ² Aríjatina gíñe ábanya ánjeli ñúbinti lueígiñe oúbaü le ñígiñe lubeí láfuara wéyu láu liséyun Búngiu le wínwanbei. Ába lagúaragun ánjeli ligía láu umálali jéreti joun gádürü ánjeligu ja abíjubaña ubáfu lun jadúgün wuríbani lun múa lúma barána.

³ —Madúga jumá wuríbani lun múa, ni lun barána, ni lún buri tídibu wéwe daríme wíchuguni liséyun Búngiu luágu jerébe lánigu.

⁴ Agáamba numúti átiriñanu lan. san bián-wein-gádürü mílu jádaangiñe linébaanfaangu Israél.

⁵ Dúusu míluñanu jádaangiñe ladúgawagun Judá,

dúusu mílu jádaangiñe ladúgawagun Rubén,

dúusu mílu jádaangiñe ladúgawagun Gad,

⁶ dúusu mílu jádaangiñe ladúgawagun Áser,

dúusu mílu jádaangiñe ladúgawagun Neftalí,

dúusu mílu jádaangiñe ladúgawagun Manasés,

⁷ dúusu mílu jádaangiñe ladúgawagun Simeón,

dúusu mílu jádaangiñe ladúgawagun Leví,

dúusu mílu jádaangiñe ladúgawagun Isacár,

⁸ dúusu mílu jádaangiñe ladúgawagun Zabulón,

dúusu mílu jádaangiñe ladúgawagun José,

jáma dúusu mílu jádaangiñe ladúgawagun Benjamín.

Sarágu gürígia jarútu jadáüragun

⁹ Lárigiñe cátei le, ába naríjin sarágu güriña lí-daangiñetiña sun fulásu, sun rása, sun luwúyeri dimúrei lúma néchaani, rára jáña ligíbugiñe lála Búngiu ligíbugiñe Mudún. Gíbetiña güriña jagía darí lun siñá lan jabájüdún, jarútu jadáüragun táu tubána fáluma jájaburugu. ¹⁰ Ába jagúarajan sun jagía láu umálali jéreti, ába jaríñagun. Weíriti Búngiu, le ñúnbei luágu lála, weíriti Mudún, luágu asálbaruni le rújamaalíbei woun.

¹¹ Rára jáña sun ánjeligu geyégu láu lála lúma geyégu jáu weíyaaña mútu, jáma gádürü cátaña gabágaritiña jagía, ába jelémuchun dagá jagíbu múarugu ligíbugiñe Búngiu, ába jájuduragun lun, ¹² ába jaríñagun.

¡Ítaralá! Rualá uweírigu, lichú áu, eteíngiruni, inébesi, ubáfu lúma érei lun Wabúngiute lun sun dan. Ítaralá.

¹³ Ábati lálügüdünina ában jádaangiñe weíyaaña mútu jagía.

—¿Cátañasan ja, ja jarúbaña adáüragun? ¿Jalíagiñésan jayábin?

¹⁴ Naríñaga lun.

—Amúrü jamúga aríñagei nun.

Laríñaga nun.

—Ja sáfurijañabaña sarágu ja, ja chibá jamaalíbei jafígoun láu líta Mudún, jarúmagüda jamóun janígi láu.

¹⁵ Ligía ligíbugiñeñanu lubeí lála Búngiu esériwida lun, wéyuagu áriebu tídan lúban to siéluboun, loúnigirubaña Búngiu láu leréderun jáma. ¹⁶ Máfagun jáñame ilámaü, ni mágürabu, másürün láñame wéyu, mañáurijan láñame lárouga, ¹⁷ ladúga loúnigirubaña lan Mudún le lubádubei lála Búngiu, ábame lanúgüniña lárún dúna le íchugubei ibágari magúmuchaditi, ábame larágajani Búngiu sun águirau lueigiñe jágu.

8

Tisédün séyu lúma lágei cupáli le gólu

¹ Dan lajeíridúnbarun Mudún tisédün séyu to tuáguboun líburu, ába ñi lan maníguauí siélu queí buri luágu dimí óra. ² Ába naríjiniña sédü ánjeligu ja rárabaña ligíbugiñe Búngiu, ába líchugúniwa sédü fídu joun. ³ Lárigiñe, ábaya liábin ában ánjeli, ába laráramun ligíbugiñe latárü, ñíñein ában lágei cupáli gólu lújaburugu, ába líchugún bürúbün cupáli lun, lun ladágaragüdüni úara lúma jayúmuragun sun ja lánigu Búngiu ligíbuagu latárü gólu le ligíbugiñebei lála Búngiu. ⁴ Ába lamúdeirun lugúmulalin cupáli ligía úara lúma jayúmuragun lánigu Búngiu lun ligíbugiñoún Búngiu. ⁵ Ábati lanúgüni ánjeli ligía lágei cupáli, ába labuínchagüdüni láu leñégura wátu lídaangiñe wátu geméti le luágubei latárü, ába lachúrüni luágun uboú, ába lagaambún wayújururu, ireíni, labírijaníga, lúma ában járabaganáli.

Lé buri fídu

⁶ Ábati jaráanserun sédü ánjeligu ja láubaña sédü fídu lun jínwiruni.

⁷ Ába línwiruni furúmiñeti ánjeli lifídun, ába lasáli-ragun lúbara júya le deréguati lúma wátu geméti, láu gíñe jítaü, ába lachágarúniwa luágun uboú. Ába lágudun lúruwan murúsun lídaangiñe uboú, ígirúati bián murúsun mágudúnti, gudáwati gíñe lúruwan murúsun lídaangiñe buri tídibu wéwe lúma jíduru.

⁸ Ába línwiruni jabíaman ánjeli lifídun, ába lachágarúniwa ában cátei camá jamuga ában oúnwenbun wúbü durúnguati baránajoun, ába lasáliragun lúruwan murúsun lídaangiñe barána jítaüme. ⁹ Jiláguatiña sun úduraü ja

lídaanbaña barána le asálrágubei lun jítaüme, güürínguatú gíñe sun ugúnein to ñíboun lídan barána ligía.

¹⁰ Ába línwiruni júrüwan ánjeli lífidun, ába teíguadun ában oúnwenbun warúguma siélugiñe, durúngu quei ában tóchi. Táburuja luágun lúrüwan murúsun lídaangiñe dúna lúma líseesen dúna. ¹¹ Igífi tíribei warúguma tugúya, ába lagífidun lúrüwan dúna, ába jóúwegun sarágu güürígia ladúga lagífidun dúna ligía.

¹² Ába línwiruni jagádürün ánjeli lífidun, ába lagúrinchagun lúrüwan murúsun lídaangiñe líbiri wéyu, láu sun játi, jáma warúguma. Le oúbaü le agúrinchagubei jawágu, ába labúridun, marúgoungadunti wéyuagu ni áriebu.

¹³ Lárigiñe, ába naríjin ában dunúru weíríti ájamaja lamídaangua siélu, aríñageina ligía láu umálali jéreti.

—¡Fugíábugume ja aganoúbaña uboúagu luágu úrüwa lanárimeníga lé buri lúnbei láburuja jawágun dánme jínwiruni ja jíbiri úrüwa ánjeligu jaffidun!

9

¹ Ába línwiruni jaseíngün ánjeli lífidun, ába naríjin ában warúguma eíguadutu siélugiñe lun múarugun, ába líchugún ligélen júyu le mébejabei tun. ² Ába tánjunrenchuni júyu ligía, ába láfuridun gumúlali ñígiñe camá lídaangiñe ában oúnwenbun órno, ába labúrigadagüdüni gumúlali ligía wéyu lúma garábali. ³ Lídaangiñe gumúlali ligía ába jachúlaagun chigángaru, ába jájamajani sun uboú, ába jabíjin chigángaru jagía ubáfu líbe jabáfu águru ja uboúagubaña. ⁴ Ába laríñawagún joun lun madúgün jamá wuríbani lun jíduru le uboúagubei, ni lún buri nádü, ni lun tídibu wéwe, lueídügü joun güürígia ja úabei liseíni Búngiu jeréberugu. ⁵ Majoúati lun jáfaraguniña chigángaru jagía güürígia, lueídügü lun jásjaniña güürígia luágu

seíngü játi, ítara líñati ligári jásüjan quei jásüjan águru. ⁶ Lídaanme buri wéyu ligía, jáluajabei gürígia ouweni, madárijabei, busén jagía yebéme jóúwegun, ladiseduba ouweni jaweí.

⁷ Chigángaru jagía, jenége gabáyu ja aráanseñubaña lubá wuríbu, ñíñein ában cátei jábulugu camá jamuga ában rídi le gólu, ítara líña jagíbu quei ligíbu wügúri. ⁸ Ítara líña jádiburi quei jádiburi würiña, liábin jári, quei lári liñún. ⁹ Darúgu líña jágubu láu ában cátei camá gürábu, ítara líña lamúri jarúna quei tamúri sarágu cárü to jáutu gabáyu dan le teíbaagun wuríburugu. ¹⁰ Gálitiña quei jáli águru le gágiriti. Níñein ubáfu luágu jáli lun jadúgün wuríbani joun gürígia luágu seíngü játi. ¹¹ Níñein ában jábuti chigángaru jagía, le ánjeli le láni júyu le mébejabei. Abadón líribei ánjeli ligía lídan hebréo, lídan güriégu, Apolión o Agúnrinchaguti.

¹² Sügúja furúmiñeti lanárimeníga, mégeigili bián.

¹³ Ába línwiruni jasísin ánjeli lífidun, ába nagáambun ában umálali lídaangiñe gádürü larígei latárü gólu le ligíbugiñebei Búngiu. ¹⁴ Ába laríñagun umálali ligía lun jasísin ánjeli le láubei fídu.

—Farára báña gádürü ánjeligu ja güráñubaña láru óunwenbun dúna le Eufrátes.

¹⁵ Ába jafáragadún gádürü ánjeligu jagía lun jáfaragun ában jádaangiñe cáda úrüwa gürígia jilágubei, ladúga aráanserúaña lubá óra ligía, wéyu ligía, játi ligía, lúma irúmu ligía. ¹⁶ Ába nagáambuni átiriñanu lan jasúdaaranigu ja luágutiña gabáyu. bián-san míñun.

¹⁷ Ítara líña ligáburi jayáwadagun gabáyu jagía jáma ja waríñubaña jawágu nun. Níñein ában cátei janíguagu, funáti licólorun, dínguti, lúma amariyu. Ítara líña jábulugu gabáyu jagía quei jábulugu liñún, áfurijati

wátu geméti, gumúlali, lúma sáfuru jayúmulugugiñe. ¹⁸ Ába láfaraguniña úrüwa wuríbani le áfuridubei jayúmulugugiñe gabáyu jagía ában jádaangiñe cáda úrüwa gürígia jilágubei, úrüwa wuríbani ligía. wátu geméti, gumúlali, lúma sáfuru. ¹⁹ Jayúmuluguñein gabáyu jagía jabáfu, lúma luágu jáli, ítara líña jáli camá jéwe gábuluguti, láu gíñe jadúga wuríbani.

²⁰ Ja jíbiri gürígia ja mouwegunbaña láu wuríbani le, mígirun meme jamúti jadáaguni cátei lé buri meja jadúgübei, mígirun jameí jájuduragun joun espíritugu wuríbatiña lúma joun sánda ja gólu, pláta, brónse, dúbü, wéwe—ja siñáti jaríjin, ni jagáambun, ni jeñbun. ²¹ Mígirun jameí jáfarajan, jabíñarajan, jasálufurijan, lúma jíwerujan.

10

Ánjeli táu tiraúraü líburu

¹ Ábati naríjin ábanya ánjeli gabáfuti, ába larárirun siélugiñe lídan juánriñu táu ában jerémuru lougiñe lichúgü. Miríti ligíbu quei wéyu, liábin lúruna camá durúngu líña. ² Níñoun ában tiraúraü líburu junréngu lújaburugu. Ába líchuguni lugúdi le loúnwenren lougiñe barána, le lubaúna lougiñe múa. ³ Ábati lagúaragun láu umálali jéreti quei ában liñún dan le lówoujan, dánti le lagúaragunbei, ába lagaambúniwa ladúrügüdün sédü wayújururu. ⁴ Lárigiñe ladúrügüdün sédü wayújururu ligía, ába yebe nabúrújaali lan le laríñagubei, ába nagáambun laríñagun ában umálali nun siélugiñe.

—Maríñagabeí le laríñagubei sédü wayújururu, mabúrújabeí gíñe.

⁵ Ánjeli bugáti le naríjubei lougiñe barána lúma lougiñe múa, ába liñúruni lújabu le louñwenren siélun, ⁶ ába láfiñurun luágu le gabágaribei lun sun dan, le adúgübalin ubouú láu sun siélu, barána lúma sun cátei le lídaanbei, ába laríñagun.

—Úadügüyáali darásaü. ⁷ Dánme le lachúlürün dan lun lagúmeserun jasédün ánjeli ínwirei lifídun, gúnfuljalíme laráansejan Búngiu lé meja arámudaguabei, quei le laríñaguni meja joun profétagu ja esériwidubalin.

⁸ Ábaya ladímurejan umálali lé buga nagáambubei siéluigiñe, ába laríñagun nun.

—Beíba, banúgounme tiraúraü líburu to daráguboun, to lújaburuguboun ánjeli le rárabei lougiñe barána lúma múa.

⁹ Ába nídin, ába namúriajanun líburu tugúya lúma ánjeli ligía, ába laríñagun nun.

—Jan, jóuboun, bímebei basándirunun biyúmulugu, tagífidame burágeirugu.

¹⁰ Ába nanúgünun tiraúraü líburu tugúya lújaburugugiñe ánjeli ligía, ába neiginun, bímeti nasándirunun niyúmulugu camá síruudu, lárigiñe neiginun, ába tagífidun nurágeirugu. ¹¹ Ába laríñawagúniwa nun.

—Lúnti bídinya aríñagei le lúnbei lasúseredun lun sarágu fulásu, néchaani, luwúyerigu dimúrei, lúma joun urúeigu.

11

Ja bián geféentiña

¹ Ábati líchugúniwa ában mabúru nun lenége ában wéwe le amísuraagülei, ába laríñagun Búngiu nun.

—Sarába, amísurajaboun lilígilisin Búngiu lúma latárü, abájüda báñame átiriñanu lan ja ájuduragutiña ñi.

² Mamísurajabei bürürü le bougudibei tibíti ligílisi ladúga derégewaali joun ja terénchabaña lun Búngiu, ja lúnbaña jagúnrinchaguni ubúru le sándubei luágu bián-wein-bián játi. ³ Ábame nouñajan bián geféentiña lun jadímurejan nuágu luágu mílu bián-san úruwa-wein wéyu, táu jadáuragun lúdu.

⁴ Bián geféentiña jagía, jagía gayáwabalin bián tídi bu wéwe to olívo lúma bián lébu sanúdelu le ligíbugiñebei Búngiu, le Labúremebei sun ubou. ⁵ Ánjein ñi abúseerúti ladúgün wuríbani joun, ába jígiragüdün wátu geméti jayúmulugugiñe, ába jáguduniña jáganiñu gumúgubei. Ítarati louweba furúmieguaugü le buséti ladúgün wuríbani joun. ⁶ Gabáfutiña geféentiña jagía lun jadáuruni siélu lun májuyun lan júya sun dan niján lan Búngiu adímureja jayúmulugugiñe, gabáfutiña gíñe lun jadúgüni dúna jítaüme, lun gíñe jasúfuriragüdüni ubou láu sun luwúyeri wuríbani, ságü jabúseerun. ⁷ Dánme le gumú jamaali jawádigimari, lageíndaguba anímaalu le áfuridubei lídaangiñe júyu le mébejabei jáma, ábame jeféridiruni wuríbu, ábame láfaruniña jilágubei. ⁸ Ábame jeréderun riwágu lídan lémeri ouñwenbun ubúru le Jerusalén le ñí lubei ládarawagúa Jesúsu luágu gurúwa, fulásu meme le, camá Sodóma lúma Ejípto. ⁹ Ábame jaríaguniña gürígia ja lídaangiñetiña sun fulásu, sun rása, sun luwúyeri dimúrei, lúma néchaani luágu úruwa wéyu dimí, mígirunbaña lun jábunún. ¹⁰ Ábame jagúndaaragun ja ubouagubaña láu jóúwegun, daríme lun jedéweegun cátei jámagua, le jagúndan, ladúga berése jamá meja bián lánigu Búngiu jagía joun. ¹¹ Ába naríjin, áu Juan, luágu lárigiñe lan úruwa wéyu dimí ligía, ába láguyuguagüdüniña Búngiu, ábaya jásaarun, áni sun ja aríjubaliña, weíríti janúfudeda-

gun. ¹² Ába jagáambun bián geféentiña jagía ában umálali jéreti siéluḡiḡe le aríñagubei.

—Weínjuma ñájoun siélun.

Ába jamúdeirun siélun lídan ában juánriñu, aríagu jáganiñu joun. ¹³ Lídan óra ligía, ába ladágarun ában oúnwenbun járabaganáli, ába tagúluludun ában múná tídaangiḡe ságü díisi to ubúruguboun, ába jóúwegun sédü mílu güriḡia ladúga járabaganáli ligía. Ja jíbiri güriḡia, ába jíchugun inébeſei lun Búngiu le siélubei ladúga luweírín janúfude.

¹⁴ Süḡíja libíaman lanárimeníga, madísebei le ában.

Le lisédün fídu

¹⁵ Ába línwiruni jasédün ánjeli lifídun, ába lagaambúniwa laríñagun umálali buri jéreti siéluḡiḡe.

Chülújali lidáni Wabúreme Búngiu lúma lidáni Críſtu lun jarúeijan lídan sun uboú, áni jarúeijaba sun dan.

¹⁶ Ábati jélemuchunga weín-gádürü güriḡia ja weírigutiña, ja ñúnbaña luágu jála le lála urúei, láu jagíbu múarugu, ába jájuduragun lun Búngiu. ¹⁷ Ába jaríñagun.

Teínqui wáña bun, Wabúreme Búngiu,

amúrü le Súnti Gabáfu,

amúrü le wínwanbei lúmagiḡe lubáragiḡe furúmiñeti dan, wínwan amúrü guetó, wínwan amúrüme sun dan.

Teínqui wamútibu ladúga ragúbaali lan oúnwenbun bubáfu.

áni guméseedibu arúeija.

¹⁸ Gáñiburija néchaanigu, chülúja wéyu lun babeíjan,

chülúja gíñe dan lun bagúseragüdüniña jiláguaaña,
 ábame bíchuguni jafáyeiruaja báni profétagu joun,
 jáma jíbiri ja derégeguabaña jóungua bun, jáma sun
 jawúyerigu güriña ja íchubaña inébesi lun bíri.

Chülúja óra lun bagúnrinchaguniña ja agúnrinchagubalin
 uboú.

¹⁹ Ábati tánjunrenchun lúban Búngiu to siéluboun, ába
 tarijín gáfu to lágei lidáradun Búngiu jáma lumútuniña ñi
 tídan lúban. Ába ñi lan labírijaníga, ireíni, wayújururu,
 ában járabaganáli, lúma láburuan lúbara júya deréguati
 le weínamuti.

12

Wúri lúma anímaalu le dragón

¹ Ábati lasálriragun ában oúnwenbun seíni siélu. ában
 wúri darúgu líña wéyu táu camá jamuga ában dínugu, láu
 játi lábugiñe tugúdi, lúma ában rídi jáu dúusu warúguma
 tábulugu. ² Wúri tugúya dageínañoun, tagúaraja láu
 igári le lánina agáriduni, ladúga súfuritu lun tagúriaian.

³ Ábaya lasálriragun ábaya seíni siélu. ában oúnwen-
 bun anímaalu le dragón funáti, sédüñein lóbulugu, díisi
 ligáanchun, lúma ában rídi luágu cáda lóbulugu. ⁴ Ába

ladúrugudun dragón ligía ában jádaangiñe ságü úruwa
 warúguma láu líli, ába lajúnruniña múarugun. Ába larára-
 mun dragón ligía tigíbugiñe wúri to lúnboun tagúriaian,

lun leígini tiraú dánme le tagúriaian. ⁵ Ába tagúriaian
 wúri tugúya ában wügúri irájü le lúnbei ledéraagüdün
 lagúmadijan lídan sun fulásu queísi láu ában murúsun
 gürábu. Ába lagídarúniwa tiraú tueí, ába lanügúniwa
 lun Búngiu luágun lála. ⁶ Ába tanúraian wúri tugúya lí-
 doun fulásu mageírawati le ñí lubei aráanseeli lan Búngiu

ubáraü tubá, lun toúnigirúniwa ñi luágu mílu bián-san úrüwa-wein wéyu.

⁷ Lárigiñe, ába ñi lan ában wuríbu siélu, ñí lubei lageíndagua árcanjel Miguél jáu láni ánjeligu lúma dragón. Ageíndaguati dragón jáu láni ánjeligu, ⁸ ába jeféridiruni wuríbu, ába mabáaraña lan siélu. ⁹ Ába lubeíti laságarún oúnwenbun dragón, le binádu jéwe ligíra le gíríbei Máfia, o Satanási, le ayéejabalin sun ubouú, siéluigiñe. Ligía jáu sun láni ánjeligu, ába jachágarún múarugun.

¹⁰ Ábati nagáambun laríñagun ában umálali jéreti siéluigiñe.

—Gáñei láali Búngiu Máfia láu luweírin lubáfu. Chülújali asálbaruni joun gürígia ubouúagun, chülújali larúeijan Búngiu lúma lagúmadijan Crístu, ladúga sagáwaali le íchugubei jadúnrun wadújeñu lueígiñe Jesucrístu, le íchigañajábei jadúnrun wéyuagu, árieibu ligíbugiñe Wabúngiute. ¹¹ Sirígua jamáali láu loúnwen Mudún, le Jesucrístubei, lúma láu jíchugun fe luágu láni Búngiu ugánu luágu asálbaragülei, manúfudeduntiña lueí jeféridiruni jabágari, aráanseñu rügútiña lun jounwen. ¹² Gúndaalá lubeíti siélu, gúnda jumá jugúya le aganoúbei ñi. ¡Áni fugiábugu ja aganoúbaña ubouúagu, lúma baránaja! Núdünja Máfia júmoun láu oúnwenbun igáñi, ladúga subúdi lumúti luágu murúsun rügáali lan lidáni.

¹³ Dánti laríjinbei dragón luágu fíwaali lan ubouúagun, ába leíbaajanun wúri tó buga agúriajaboun. ¹⁴ Ába líchugún bián larúna dunúru le weínamuti tun wúri tugúya lun gayára lan tájamarun lídoun fulásu magefrawati díse lueí dragón ligía, le ñíba lubeí toúnigirúa luágu úrüwa irúmu dimí. ¹⁵ Ába

lewéran dragón ligía sarágu dúna liyúmulugugiñe lun lañaradaguagüdünnun wúri tugúya. ¹⁶ Ába líderagunun múa wúri tugúya, ába lánjunrenchun múa, ába lachúruni sun dúna le lígiragüdübei dragón liyúmulugugiñe. ¹⁷⁻¹⁸ Gáñitimaati dragón túma wúri tugúya, ába lídin ageíndagua jáma tirájüñü ja ñúdübaña láu le lubeíbei Búngiu, falájamei ugánu le láni Jesucrístu.

13

Ja mónsturugu

¹ Ába naráramun láru béya, ába naríjin lamúdeirun ában mónsturu baránajagiñe, sédüñein lábulugu, dísi ligáanchun. Ñíñein rídi luágu cáda ligáanchun lúma ában íri le áubei lanábaguei Búngiu luágu cáda lábulugu. ² Mónsturu ligía lenége geígusi, ítara líña lugúdi queísi lugúdi óso, liábin liyúma camá liyúma liñún. Ába líchuguni dragón lubáfu lúma lála lun, lúma sarágu ubáfu lun lagúmadijan. ³ Ñíñein ában chaúnti luágu ában lídaangiñe lábulugu mónsturu ligía, weíríti lún yebe láfaruni jilágubei, ába lareídagun lichaúntin. Weíríti janígi sun gürígia láu mónsturu ligía. ⁴ Ába jájuduragun lun dragón luágu líchugun gumádi lun mónsturu, ába gíñe jájuduragun lun mónsturu, ába jaríñagun.

—Úati ni ában quei mónsturu le, ¿cába gayára láfaruni?

⁵ Ígirúati gíñe mónsturu ligía lun ladímurejan dimúrei buíti luógu lúma lun lanábaguni Búngiu, lúma lun lagúmadijan luágu bián-wein-bián játi. ⁶ Ába ladúgün ítara, adímurejati wuríbati luágu Búngiu, anábaleí líri, lúban, jáma ja siélubaña. ⁷ Ígirúati gíñe lun lageíndagun jáma lánigu Búngiu darí lásiiragúniña, ába líchugúniwa ubáfu lun jawágu sun rása, fulásu, luwúyerigu dimúrei

lúma néchaani. ⁸ Ába jájuduragun sun ja aganoúbaña uboúagu lun mónsturu ligía, ja úabaña jíri bürúwañu lúmagiñe ladügún uboú tídan líburu to lánina ibágari, to lúmaboun Jesucrístu, le Mudún le ouwebei.

⁹ Le garigeiruguti lun lagáambun, agáambalá. ¹⁰ Ja adáürütiña ámu, jadáürawagúba gíñe, ja áfarajatiña táu efeín, jáfarawagúba gíñe táu efeín. Ligía busén jabeí lánigu Búngiu gurásu lúma afíñeni.

¹¹ Lárigiñe, ábaya naríjin ábanya mónsturu lamúdeirun múarugugíñe. Níñein bián gánchu luágu camá ligáanchun mudún, áni ítara líña ladímurejan camá ában dragón. ¹² Níñein sun ubáfu le láni furúmiñeti mónsturu lúma lun ladügüni cátei lueígiñe loubadina furúmiñeti mónsturu. Ába ladügün lun jájuduragun sun gürígia ja uboúagubaña lun furúmiñeti mónsturu, le lareídagugüdübei lueígiñe chaúnti le luágubei. ¹³ Adúgati gíñe oúnwenbun buri miláguru, áburujagüdati wátu geméti siélugiñe lun múarugun jagíbugiñe gürígia. ¹⁴ Lídaangiñeti miláguru buri le únbei líchugúa ubáfu lun ladügüni lueígiñe loubadina furúmiñeti mónsturu, ába leyéeduniña ja aganoúbaña uboúagu, ába ladúgagüdüni ában liyáwa mónsturu le gawágubalin chaúnti ába lareídagun, joun. ¹⁵ Ába libíjin jabíaman mónsturu ubáfu lun líchugun ibágari tun liyáwa furúmiñeti mónsturu lun tadímurejan lúma lun táfaraguniña sun ja májuduraguntiña tun. ¹⁶ Adúgati gíñe lun sun lan gürígia—weínamujaña, ñúbürigiña, rísitiña, gudémetiña, idámuni, máma idámuni—lun labúrüdún líri mónsturu luágu jájabu le joúnwenren o luágu lan jerébe. ¹⁷ Úati ni ában gayáraati lagáñijan ni cáta ni lalúgurajan ánjein úa líri mónsturu o linúmerun líri luágu. ¹⁸ Buséntitia

cátei le lichú áu, le gunfaráandati, atúriajaleí linúmerun mónsturu, le ábanbei quei líri wügúri, áni niján númeru le asálrubei lídaangiñe lilétürana íri ligía. sísi-san úrúwa-wein-sísi.

14

Jerémujan ja san bián-wein-gádürü mílu

¹ Lárigiñe líra, ába naríjini Jesucrístu, le Mudún, rára lábulugu wúbü le Sión, le siélubei. Níñanu san bián-wein-gádürü mílu gürígia lúma, ja bürúwañubei líri Mudún lúma líri Lúguchi jeréberugu. ² Lárigiñe, ába nagáambun ában amúri ñúbinti siéluigiñe camá lamúri barána, camá gíñe ladúrügüdün ában wayújururu le jéreti, ítara líña gíñe camá jamuga tamúri sarágu gidára. ³ Ába jerémujan gürígia jagía ában urému iséri ligíbugiñe lála Búngiu lúma jagíbugiñe gádürü cátaña gabágaritiña jagía, lúma jagíbugiñe gürígia ja weírigutiña. Úati ni ában gayára lumúti laníchigu lerérun urému ligía gunfaráanda jawéidügüya san bián-wein-gádürü mílu ja asálbarúabaña jádaangiñe ja ubouágubaña — ⁴ jagía ja mádaragúnbaña jóungua jámoun würíña, reideitiña jarúmañu, falájamei Mudún le ñíjin lumúti lídin, sálbawatiña jádaangiñe gürígia quei furúmiñeti edéweejani lun Búngiu lúma lun Mudún. ⁵ Madárirúnwati ni murúsun iyéeni luágu jayumáru ladúga jarúmatiña ligíbugiñe Búngiu.

Ugánu buri le jíchubei úrúwa ánjeligu

⁶ Ábati naríjin ábaya ánjeli ájamaja lamídaangua siélu, ñíñein ugánu le magúmuchaditi lúma lun lapúrichijani joun ja aganoúbaña ubouágu—joun sun néchaanigu, rása, luwúyerigu dimúrei lúma sun fulásu. ⁷ Laríñaga láu umálali jéreti.

—Inébelá Búngiu jun, ru jugúyame uweírigu lun, chülúja dan lun lagúseragüdün. Judúgua jumá lun le adúgübalin siélu lúma ubou, barána lúma líseesen dúna.

⁸ Ába liábin ábanya ánjeli lárigi, ába laríñagun.

—Jeígua, jeígua Babilónia to weíríguboun, ladúga tabácharuadágüdüni sun néchaani láu bínu le lánina liwíye tayúmajan.

⁹ Ába liábin ábanya júrüwan ánjeli, ába laríñagun láu umálali jéreti.

—Le ájuduraguti lun mónsturu lúma tun liyáwa, ígira ligíame lun labúrüdúniwa líri mónsturu luágu lújabu o leréberugu, ¹⁰ látubei bínu le lánina lanárime ligáñi Búngiu le lúnbei láburujan le gumúti luágun, ábame lasúfurirun láu wátu lúma súfuru ligíbugiñe Jesucrístu lúma jagíbugiñe ánjeligu ja sándubaña. ¹¹ Laweínruba lugúmulalin wátu le asúfuriragüdübaña lun sun dan, úabei eméraaguni ni wéyuagu ni áriebu joun ja ájuduragubaña lun mónsturu lúma tun liyáwa, o ja bürúwañubei líri jawágu. ¹² Ligía lébubei lúnti lan gagúraasun jamá lánigu Búngiu ja ñúdünbaña láu le lubeíbei áni falájamei Jesúsú surúñu, lun ítara meme jamá derégüdagu lídan jaffínen darí lúmoun joúnwen.

¹³ Ábati nagáambun laríñagun ában umálali ñúbinti siélugiñe nun.

—Abúrújabeí le. “¡Gúnda jamá ja ouwetiña láu jaffínen luágu Jabúreme Jesucrístu!” Lúmagiñe óra ligía, jeméraaguba lídaangiñe jawádigimari, ábame lídin le jadúgübei úara jáma, líña Sífiri Sándu.

Lalúbajouniwa múa

¹⁴ Ábati naríjin ában juánriñu jarúti, ligíbuagu juánriñu ligía, ñun líña ában lenége Jesucrístu, le Wügúri

Garaúwarügüti. Ññhein ában rídi gólu lábulugu túma ában alúbagülei jamánatu lújaburugu. ¹⁵ Ába láfuridun ában ánjeli tídaangiñe lúban Búngiu to siéluboun, ába lagúaragun láu umálali jéreti lun le ñúnbei ligíbuagu juánriñu.

—Dáboun balúbagüle, ladúga chülúja dan lun alúbajani, ladúga funáali nádü.

¹⁶ Ába lásügüragúdünun le ñúnbei luágu juánriñu lalúbagüle múarugugíñe, ába lalúbajan.

¹⁷ Ábayati láfuridun ábaya ánjeli tídaangiñe lúban Búngiu to siéluboun táu gíñe lalúbagüle jamánatu.

¹⁸ Ábaya láfuridun ábanya ánjeli lídaangiñe latárü, ánjeli ligía, gabáfuti luágu wátu geméti le luágubei latárü ligía. Ába lagúarun lun le táubei lalúbagüle láu umálali jéreti, ába laríñagun lun.

—Dáboun balúbagüle to jamánaboun, alúbajaboún tirésini beíbei to múaruguboun, ladúga funáaru.

¹⁹ Ába lásügüragúdünun ánjeli ligía lalúbagüle múarugugíñe, ába lalúbajanun beíbei to múaruguboun, ába líchugunun lídoun ában ágei weíríti lun taríbichawagúniwa. (Míni lan líra, lanárime abeichúni le lúnbei liábin lúmagiñe Búngiu.) ²⁰ Ába taríbichawagún beíbei bougudi libíti ubúragu, ába láfuridun jítaü lídaangiñe tágei chülú lúmoun líñun jafürenun gabáyu, úrüwa-san kilómetro geyégu.

15

Ánjeligu jáma jagúmujoún sédü ígei

¹ Ába naríjin ábanya oúnwenbun seíni siélu, weírigüdati anígi. sédü ánjeligu jáu jagúmujoún sédü ígei, ja áubaña lagúmucha ligáñi Búngiu.

² Aríjatina gíñe camá jamuga ában barána le bídiriu láu wátu geméti lídan, ñíñanu ja agáñeirubaliña luágu mónsturu, túma liyáwa, lúma luágu linúmerun líri, rára jáña lubádu barána le bídiriu ligía táu gidára to líchuguboun Búngiu joun. ³ Ába jerémujani lerémun Moisés lé meja esériwidubei lun Búngiu, lúma lerémun Mudún, le ítarabei.

Weíríti áni buíti sun le adúga báalibeí,

Wabúreme Búngiu, Súnti Gabáfu,

surúñu líña sun le badúgübei, úragua,

amúrü le Lurúeitebei sun néchaani.

⁴ ¿Cábasan manúfude bueí, Wabúngiute?

¿Cábasan madímurejan buíti buágu?

Amúrü rügúñadibu mafígounjan,

jayábinba lílana sun fulásu, ábame jájuduragun bun,

ladúga arijúaaali luágu buídu lan sun le badúgübei.

⁵ Lárigiñeti sun cátei le, ába naríjini fulásu le sándutimaabei tídan lúban Búngiu siélu, fulásu le ñí lubei lerédera Búngiu, júnren lubéneri. ⁶ Ába jáfuridun sédü ánjeligu ja jáubaña sédü ígei jagía, ñígiñe. Táuñanu janáangun líno to jarúmatu, mirí, liábin jabélitin, gólu luágu janíguagu. ⁷ Ába liábin ában jádaangiñe cátaña gabágaritiña jagía, ába líchugun ában cópu gólu lun cáda ában jádaangiñe sédü ánjeligu jagía, buin líña cáda cópu láu luweírin ligáñi Búngiu le gabágaribeí lun sun dan.

⁸ Ába labuínchun fulásu le sándutimaabei láu gumúlali le ñúbinbei lídaangiñe luweírigun Búngiu lúma lubáfu. siñátiti lebélurun ni ában ñíjin darí jagúmuchun sédü ígei ja jámabaña sédü ánjeligu jagía.

16

Cópu buri le lágei ligáñi Búngiu

¹ Ábati nagáambun laríñagun ában umálali jéreti joun sédú ánjeligu jagía lídaangiñe fulásu le sándutimaabei.

—Jeíba áturei cópu buri láu lanárime ligáñi Búngiu uboúagun.

² Ába lídin furúmiñeti ánjeli, ába láturuni licópun uboúagun, ába lasálirun gumeín gáríti jawágu sun ja gawágubalin líri mónsturu, judúgua jagía lun.

³ Ába láturuni jabíaman ánjeli licópun baránajoun, ába lasáliragun barána queísi játa jiláaña, ába jóúwegun sun cátaña ja gabágaribaña lídan.

⁴ Ába láturuni júrüwan ánjeli licópun luágun buri dúna lúma líseesen dúna, ába lasáliragun jítaúme. ⁵ Ába nagáambun laríñagun láni dúna ánjeli.

—Úraguatibu láu bagúseragüdün ítara, Búngiu sándu, amúrü le wínwanbei lúmagiñe lubáragiñe furúmiñeti dan áni wínwan amúrü guetó, ⁶ ladúga jagía, aseíñeigüda jamúti játa profétagu jáma ja deréguabaña jóungua bun, guetóti gurágüdaadibu jítaü joun, yúuti joun.

⁷ Agáambatina giñe laríñawagun lueígiñe latárü.

—Ánja Wabúreme Búngiu le Súnti Gabáfu, agúseragüdaadibu láu ísuruni lúma úraguni.

⁸ Ába láturuni jagádürün ánjeli licópun luágun wéyu, ába libíjin wéyu ubáfu lun lachúraruniña gürígia láu lísü,

⁹ ába jachúrarun súnubei. Láu sun lira, masáansiragunti jagáburi, madímurejan jagía buíti luágu Búngiu, anábagnarügü jameí Búngiu le gabáfubei jawágu ígei ja.

¹⁰ Ába láturuni jaseíngün ánjeli licópun luágun lála mónsturu, ába leréderun larúeijan lábugiñe lubúriga. Ába buri jágüragunun gürígia jañéñe láu igári. ¹¹ Ni ítara, masáansiragunti jagáburi lun jígiruni wuríbatí léñaja jadúgübei, anábagnarügü jameí Búngiu le siélubei luágu jagárigu lúma jagúmeín.

¹² Ába láturuni jasísin ánjeli licópun luágun oúnwenbun dúna le Eufrátes, ába lamábeidun lun ñi lan úma lun jásügürün urúeigu ja ñúbinbaña lueígiñe oúbaü le ñígiñe lubeí labouúcha wéyu.

¹³ Ábati naríjin jáfuridun úrüwa espíritugu wuríbatiña liyúmulugugiñe dragón, liyúmulugugiñe mónsturu, lúma liyúmulugugiñe proféta le yéebi, ítara jáña espíritugu wuríbatiña jagía quei júa. ¹⁴ Espíritugu jagía máfianu ja adáagubaña miláguru, ába buri jáfuridun oúndaragúaña sun urúeigu ja ubouúagubaña lubá wuríbu le lánina oúnwenbun luwéyuri Búngiu le Súnti Gabáfu. ¹⁵ (“Tounigi jumátia ladúga sódinibei niábin quei liábin jíweruti árieibu. Gúndaabei le agágudúañubei, nuján lanáangun luágu, lun meíbugun lan surúsu lueí jaríjini gürígia le mabúseerun lubeí lun jaríjini luágu,” líña laríñagun Jesucrístu.) ¹⁶ Ábati jóúndaraguniña urúeigu lídan fulásu le gíribei Armagedón lídan dimúrei le hebréo.

¹⁷ Ábati láturuni jasédün ánjeli licópun garábalirugun, ába láfuridun ában umálali lídaangiñe fulásu le sánduti-maabei le siélubei. Lumálali Búngiu ligía, le ñúnbei luágu lála ñi, laríñaga.

—Adügúwaali.

¹⁸ Ába ñi lan labírijaníga, ireíni, lúma wayújururu, ába lánjingichun múa láu ában járabaganáli, jéreti sügú láu sun járabaganáli le dagáalibei lúmagiñe ñi jamá gürígia ligíbuagu ubouú. ¹⁹ Ába lafánreinragun ubúrugú weíríti le Babilónia lídan úrüwa murúsun, ába buri lagúluludun ubúrugú le ubouúagubei, ába laríttagun Búngiu luágu ubúrugú weíríti le Babilónia lun lájuluchagüdüni bínu le lánina abeichúni le loúnajabei lun lídan ligáñi. ²⁰ Sun ubouúju lúma sun wúbü, ába lagúmuchagun. ²¹ Ába

gíñe láburujan oúnwenbun buri lúbara júya deréguati siélugiñe jawágun gürígia, júrúburiti chülú lúmoun san líburu, ába janábaguni gürígia Búngiu luágu, ladúga ában lan abeichúni janárimeti.

17

Tasiadirúniwa oúnwenbun jóru

¹ Ábati liábin ában jádaangiñe sédü ánjeligu ja láubaña sédü cópu, ába laríñagun nun.

—Jigábu, narúfudaali tabeichún oúnwenbun jóru to ñúnboun ligíbuagu barána bun. ² Agánawaaña urúeigu ja uboúagubaña lídan salúfuri túma, bachárua jagía ja uboúagubaña láu bínu le lánina tisálufurin.

³ Ába lanúgünina ánjeli ligía lídoun ában fulásu mageírawati le ayáwadagubei nun láu lubáfu Sífiri Sándu, ába naríjin ában wúri waríñu luágu ában mónsturu funáti, bürúwañu líña sun luwúyeri dimúrei le anábaguti Búngiu tuágu, sédüñein lichúgü mónsturu le uágubei tañúura, díisi ligáanchun. ⁴ Wúri tugúya, gúchu lúma funáti ticólorunbei tanáangun, liábin tuwénden, gólu, dúbü buíduburiti, lúma pér-la. Ñíñein ában cópu gólu tújaburugu buin láu tisálufurin lúma liwíye tadáangun.

⁵ Bürúwañu líña ában íri teréberugu láu ában aníchigu arámudaguati. Íri le teréberugubei. “Babilónia to weír-boun, jáguchu jóru lúma sun luwúyeri iwíyeni uboúagu.”

⁶ Ába nasúbudiruni luágu bacháruañoun lan wúri tugúya láu játa ja lánigu Búngiu jáma ja áfarawagúbaña lueígiñe jadímurejan luágu Jesucrístu. Dan naríjinalin cátei le, ába laweíridun nanígi. ⁷ Ábati laríñagun ánjeli ligía nun.

—¿Cá uágu laweírda banígi? Nasúbudiragúdaali míni tan wúri to bun, láu sun mónsturu le anúgübarun, le

sédübei ichúgü, díisi ligáanchun. ⁸ Mónsturu le baríjubei, gabágariti meja, áni guetó úaali, láu sun líra, lamúdeiruba lídaangiñe júyu le mébejabei lubáragiñe lídin lídoun lagúmujóun loúnwen. Ja aganoúbaña uboúagu, ja úabei jíri bürúwañu tídan líburu to lánina íbágarí lúmagiñe ladügún uboú, laweíriduba janígi dánme jaríjini mónsturu lé meja gabágaríbei áni úaali, ábaya liábin.

⁹ ‘Níjein cátei ya joun ja gayáraabei gunfaráanda jamáni. Sédü ichúgü ligía, míni lan sédü wúbü le uágubei ñun tan wúri tugúya, ¹⁰ sédü méme ichúgü ligía, míni lan gíñe sédü urúeigu. Seíngü jádaangiñe urúeigu jagía, gumújali jarúeijan, ában jádaangiñe, larúeijaña guetó, le ában, miábingili. Dánme liábin jagúmujóun, larúeijaba murúsürügü dan. ¹¹ Le mónsturu lé meja gabágaríbei áni úaali guetó, ligía jawídünbei urúeigu, láu sun ligía lan ában jádaangiñe sédü, lárígiñeme, ábame lídin lídoun lagúmujóun loúnwen.

¹² ‘Díisi gánchu le baríjubei, díisi urúeigu ja magúmeserungiñabaña arúeija, jabíjuba jabáfu urúeigu luágu ában óra úara lúma mónsturu. ¹³ Ában lábu jarítangun urúeigu jagía, jíchugubei jabáfu lúma jarúeijan lun mónsturu. ¹⁴ Jageíndaguba lúma Jesucrístu, láfaragubaña jilágubei, ladúga Jabúreme sun abúremein ligía, Jarúeite gíñe sun urúeigu, áni jagáñeiruba gíñe sun lánigu ja lanúadajabaña Búngiu áni derégüdagu méme jáña lídan jafíñen luágu, úara lúma.

¹⁵ Ába gíñe laríñangun ánjeli ligía nun.

—Barána le baríjubei, le igíbuagubei tañúura jóru, fulásu buri, luwúyerigu dimúrei, lúma néchaani. ¹⁶ Áni díisi gánchu le baríjubei luágu mónsturu, le méme díisíbei urúeigu, teyéereeguduba jóru joun, ábame jígirunun fíwañu, surúsu, jeígubei túgürügü, ábame jágudunun

láu wátu geméti. ¹⁷ Rúlaali Búngiu tídon janígi lun jadúgüni le labúseerubei láu júaradun lun jedéregeruni jabáfu queísi urúeigu lun jíderaguni mónsturu daríme lagúnfulirun le laríñagubei Búngiu. ¹⁸ Wúri to baríjuboun, tugúya weíríti ubúругu le agúmadirubaliña lurúeitegu uboú, le gíríbei Babilónia.

18

Teíquadun Babilónia

¹ Lárigiñe sun cátei le, ába naríjin ábanya ánjeli larárirun siélugiñe láu sarágu ubáfu, ába larúgoundadun uboú láu límírin. ² Lagúaraguati láu umálali jéreti.

—Gumúgua, gumúgua Babilónia to weíríboun, guetó jábiñejaru máfianu, jarámudaguagüle sun jawúyeri es-píritugu wuríbatiña, jádibu dunúru wíyetiña queísi wadúbi. ³ Ladúga sun lan néchaanigu bachárúaaña láu bínu le lánina tisálufurin, áni agánawaaña lurúeitegu uboú túma lídan tisálufurin, alúgurajatiña buri ja uboúagubaña, rísijaña lídaangiñe luwénden touseragun túngua.

⁴ Ábayati nagáambun laríñagun ábanya umálali núbinti siélugiñe.

—Furíjuma Babilóniagiñe, jugúya le nánigu, mafán-ran jumámuga lídan tifígoun lúma lídan tabeichúniwa.

⁵ Gíbeguaali tifígoun darí lun lachúlürün siélu, áni jarítaguaali Búngiu luágu luríban touserun. ⁶ Adúga jumá tun Babilónia quei tadúga joun ámu, fáyei jumóun dóbüli lueí le tadúgübei. Rújuma ában uníñein le jéretimaati

bían weíyaasu tun sügú láu le tíchugubei joun ámu.

⁷ Súfurigüda jumóun quei méme tedéregeragun túngua lun anáanguni únguau lúma lun agúnrinchaguni, ladúga

aríñaga tan tídan tanígi. “Ñun nína ya quei ában urúei, máma nugúya ában jiñáru mámaritu, masúfurirubadina gíñe.” ⁸ Ligía liábinba lubeí tabeichún lídan ában meme wéyu—ouweni, íruni, ilámaü—ábame tagudún láu wátu geméti, ladúga gabáfuti Wabúreme Búngiu le asiadirubarun.

⁹ Lurúitegu ubouú ja aganoúbaña túma lídan salúfuri lúma irisini, jayájuba, gudémegua tugúyame joun dánme jaríjini gumúlali le lánina tagudún. ¹⁰ Ábame jeréderun díse, le janúfudei lueí tabeichún, ábame jaríñagun.

—¡Fugiábu Babilónia, ubúругu le weíribei, Babilónia ubúругu le gabáfubei, lídaanrügü murúsun óra liábin babeichun!

¹¹ Ja alúgurajatiña buri ja ubouágubaña, ayájuatiña gíñe, gudémegua ligía ubúругu ligía joun ladúga úaaña lan cába lan agáñjei ebégidinaü le janáajabei — ¹² ebégidinaü lé buri gólu, pláta, dúbü buíduburitu, pérlas, gamísa to líno to fínutu, séda, colóru buri gúchu lúma funáti, lúma gíñe sun luwúyeri fuláansu le jémeti, ílagu láuti jári léfan, fuláansu buíduburiti, brónse, gürábu, lúma dúbü miríti, ¹³ canéla, cátei lé buri jémeti, cupáli, mírra, ibíñei, bínu, aáli, fulúwaaru fínutu, lúma türígu, barútiña gíñe anímaalugu ja lúntiña janáajan ílagu, mudún, bágasu, gabáyu, cárü, ásta músu, o gürígia lun jalúgurajouún. ¹⁴ Jaríñaguba lun ubúругu ligía.

—¡Úaaru frúta buri to seméboun búma to jínsiñeña-jáboun bun sarágu, féridi báali gíñe sun irisini lúma wéndeí le búmañajabei, féridiwaali lun sun dan!

¹⁵ Jáñaja alúgurajabálin buri cátei le áni rísijaña lídan ubúругu le, jeréderuba díse le janúfude lueí labeichún, ayájuajeina, aságürijeina. ¹⁶ Ábame jaríñagun.

—¡Fugiábu ubúругu weíríti! Ítara liñá meja quei ában wúri táu tadáúragun to líno fínutu túma anáanguni to colóru gúchu lúma funáti, láu tuwénden gólu, dúbü buí-duburiti lúma pér-la. ¹⁷ ¡Lídan murúsun óra gumúja sarágu irísini!

Sún buri tarúne ugúnein, pasajéругu, mádulungu, jáma sun ja ñadágimeinbaña baránaja, díseti jeréderun. ¹⁸ Dánti le jaríjini lugúmulalin lágudun ubúругu, ába jagúaragun.

—¿Cásan meja ámu ubúругu ñíbei quei óúnwenbun ubúругu le?

¹⁹ Ába jíchaagun múa jábulugu, ayájuaaja, aságüríja, agúaragua.

—¡Fugiábu Babilónia lé buga weíríbei! Rísijañá yebe sun ja gagúnebaña wapóru baránaja láu lirísín, áni lídaanrügü murúsun óra gürínwagua.

²⁰ Gúnda jumá láu le asúseredubei lun Babilónia, amúrü siélu, júma jugúya apóstolugu, jáma profétagu, jáma sun ja lánigu Búngiu, ladúga adúgaali Búngiu gúsei jun láu lasíadiruni.

²¹ Ábati liñúrun ában ánjeli gabáfuti ában dúbü le ítarabei quei ában mulí, ába láguruni baránajoun, ába laríñagun.

—Ítara lúba laráriragüdúniwa Babilónia, ubúругu le weíríbei, marijíndügüyáwalime. ²² Magaambúndügüyáwalime tamúri gidára, fídu, bémerirugu, úaañame gíñe ñadágimeintiña bídan ni ca uwúyeri, magaambúnjalime gíñe lamúri dúbü le mulí bídan. ²³ Madúnraagúnjalime larúgounga lámpu bídan, magaambúndügüyáwalime areínjani le lánina maríei bídan, láu sun gabáfugüda báníña meja bání

alúgurajatiña lídan sun uboú, eyéedagua báña sun néchaani láu babíñarajan.

²⁴ Daríwaali játa profétagu, jáma ja lánigu Búngiu, lúma játa sun ja áfarawagúañabaña uboúagu, daríwaali játa sun jagía lídan ubúrugú lé meja Babilónia.

19

¹ Lárigiñe cátei le, ába nagáambuni jamálali sarágu güri-gia, jagúarajan.

¡Alelúya! Weíriti Wabúngiute le Súnti Gabáfu, ligía asál-barubaliña lánigu.

² Agúseragüdati láu úarani lúma ísuruni, siádi láaru oúnwenbun jóru to agádeirubalin uboú láu tisálufurin, águyugüda láali jáfarawagún lánigu tuágu.

³ Ábaya jagúarajan.

—¡Alelúya! Magúmubei lamúdeirun tugúmulalin.

⁴ Játi weín-gádürü güri-gia ja weírigutiña, jáma gádürü cátaña gabágaritiña jagía, ába jélemuchun chülú múarugun, judúguatiña lun Búngiu le ñúnbei luágu lála, ába jaríñagun.

—¡Ítaralá! ¡Alelúya!

⁵ Ábati lagaambún laríñagun ában umálali yaráfa lueígiñe lála Búngiu.

Rújuma uweíriguni lun Búngiu, sun jugúya ja esériwidubalin, áni inébelá jun,

weíyaaña, ñúbürigiña.

Fédu siélu

⁶ Agáambayatina camá jamuga jamálali sarágu güri-gia, camá lamúri sarágu dúna lúma wayújururu jéreguti, agúaraja.

¡Alelúya! Guméseeli Wabúreme Búngiu le Súnti Gabáfu agúmadija.

⁷ Gúndaagua wamá, buínwama láu ugúndani, ru wagíame uweíriguni lun,

ladúga chülúja óra lun lídan jamá ában lánigu Jesucrístu lúma, le gumúti.

Aráanseña quei ában adári lubá tamárieidun,

⁸ táu tanáangun líno to fínutu, jarúma, áni mirí.

Míni tan líno fínutu, ibágari le surúti, le jabágari lánigu Búngiu.

⁹ Ábati laríñagun ánjeli nun.

—Babúrüja. “Gúnda jamá ja amísurajoubaña lídoun fédu le lánina lúaradun Jesucrístu jáma lánigu.”

Ába laríñagun nun.

—Dimúrei buri inárüniti le laríñagun Búngiu le.

¹⁰ Ába nájuduragun ligíbugiñe ánjeli ligía, ába laríñagun nun.

—Madúgabeí le, esériwiduti áu lun Búngiu quei amúrü jáma bibíriña ja afálarubalin láni Jesúsú ugánu derégüdaguñu, lun Búngiu lun bájuduragun.

Ugánu le lanúgübei Jesúsú lídoun larúgounga, ligía lébubei sun le jaríñagubei profétagu.

Le aweínjabalin gabáyu jarúti

¹¹ Ábati naríjini siélu junréñu, ába lasálriragun ában gabáyu jarúti, léti aweínjabalin, Gúnfuliti lúma Inárüni, ligía líribei, ladúga láu ísuruni lagúmadija, láu gíñe ísuruni lageíndagua. ¹² Ámirijati lágu camá ligémeri wátu, ñíñein sarágu rídi lábulugu, ñíñein gíñe ában íri bürúwañu luágu, ligía rügúñein asúbudirei. ¹³ Anáanguni to luáguboun, feíndiwatu láu jítai. Lerérun Búngiu líribei. ¹⁴ Jafálaréiti súdeara ja siélubaña táu jadáuragun

lino to fínutu, jarútu, jarúma, waríñu jagía jawágu gabáyu jarútiña. ¹⁵ Níñoun ában efeín jamánatu liyúmulugugiñe lun láchaünguniña néchaani táu, ábame ledéraagüdüni lagúmadijan quei láu ában gürábu. Lagúseragüdübaña quei le aríbichagubarun beíbei láu lugúdi, gurágüdaleíme bínu le lánina lanárime ligáñi Búngiu joun. ¹⁶ Bürúwañu líña íri le tuágu lanáangun lúma luágu liyáda. “Jarúeite sun urúeigu, Jabúreme sun abúremeigu.”

¹⁷ Ába naríjin ában ánjeli rára lídan wéyu, le agúragubei láu érei joun sun dunúru ja ájamajabaña juánriñurugu.

—Jigóugu, oúndaragua jumá lun oúnwenbun ladíneragüdün Búngiu, ¹⁸ jou jumámuga jágürügü urúeigu, gumádimatiña, jáma wügúriña ganígitiña, jágürügü gabáyu jáu sun ja aweínjabaliña, jágürügü sun jawúyeri wügúriña dándu ja jónguatiña quei ja idámuni, dándu ñúbürigiña quei weínamujaña.

¹⁹ Ábati naríjini mónsturu jáma lurúeitegu uboú jáu jánigu oúndaraguaaña lun jageíndagun lúma le waríñubei luágu gabáyu jarúti jáma lánigu. ²⁰ Ába ladaürún mónsturu úara lúma proféta yéeti lé buga adúgübei miláguru ligíbugiñe mónsturu. Láu buri miláguru ligía, ayéeda láaña proféta ligía ja ígiraguagüdübaña jóungua lun labúrüdún líri mónsturu jawágu, judúgua jagía tun liyáwa. Dánduti mónsturu quei proféta yéeti ligía, ába jagurún wínwañu lídoun lagúnu le láubei wátu geméti lúma sáfuru. ²¹ Ja jíbiri, ába jáfarawagún táu efeín to liyúmuluguboun le waríñubei luágu gabáyu, ába jaquí-muledun sun dunúru buídu láu jágürügü.

20

Le mílu irúmu

¹ Lárigiñe, ába naríjin ában ánjeli larárirun siélugiñe láu ligélen júyu le mébejabei, lúma ában oúnwembun güríngüri lújaburugu. ² Ába lárügüdüni ánjeli ligía dragón, le binádu jéwe, le Máfiabei áni Satanási, ába lagúraguni luágu mílu irúmu. ³ Ába láguruni lídoun júyu le mébejabei le ñí lubei ladáürei. Ába lichugún ában séyu luágu béna lun mayéejandügüya láaña lan néchaanigu darí lásügürün mílu irúmu. Lárigiñeme mílu irúmu ligía, lígiragüdúwaba luágu murúsun dan.

⁴ Ába naríjini jála buri ja ibíjubaña ubáfu lun jagúser-agüdün, ñun jáña luágu. Aríja numútiña gíñe jawáni já meja adúrürúbaña ichúgü lueígiñe japúrichijani Lerérun Búngiu lúma lueígiñe jadímurejan luágu Jesucrístu, ja májuduragunbaña lun mónsturu ni tun liyáwa, mígirun jagía lun lichugún líri luágu jerébe o luágu lan jarúna. Ába naríjin jásaarun lídaangiñe ouweni lúnya jabágaridun, ába jagúmadijan úara lúma Crístu luágu mílu irúmu. ⁵ Ánjeinti ja jíbiri jiláguaaña, másaaruntiña lídaangiñe ouweni daríme lárigiñe mílu irúmu. Niján furúmiñetibeí ásaaruni lídaangiñe ouweni. ⁶ ¡Gúndaatiña áni lánigu Búngiu jagía ja gafánraanbaña lídan furúmiñeti ásaaruni lídaangiñe ouweni! Mabáfuti libíaman ouweni jawágu, lubáragiñe líra, fádirigubaña láni Búngiu lúma láni Crístu, ábame jagúmadijan úara lúma Crístu luágu mílu irúmu.

⁷ Dánme sügújali mílu irúmu ligía, ligíame lígirawagüdün Máfia lídaangiñe júyu le mébejabei, ⁸ ábame láfuridun lun layéejaniña néchaanigu lídan sun uboú. Láfuriduba ayéedaña ubáfu buri le Gog lúma Magóg, ábame loúndaraguniña jánigu, ja gíbebaña quei lisá-gounte barána, lun wuríbu. ⁹ Ítara líña lubeíti, ába jáfuridun súdeara jagía lídaangiñe sun uboú, ába jegéyeda-

guni fulásu le ñí jabei lánigu Búngiu lúma ubúругu le jínsiñebei lun Búngiu, le Jerusalénbei. Ába lou-najan Búngiu wátu geméti siéluigiñe, ába láguduniña gumúgubei. ¹⁰ Máfiati le ayéedubaliña, ába lágurúniwa lídoun lagúnu le láubei wátu geméti lúma sáfuru, le ñíjin lubei jágurúa mónsturu lúma proféta yéeti. Jasúfuriruba ñi wéyugau, áriebu lun sun dan.

Wisiyu ligíbugiñe óunwenbun jalaú jarúti

¹¹ Ábati naríjin ában óunwenbun jalaú jarúti, ñíñein Búngiu ñun luágu. Ába lagúmuchagun siélu lúma ubou ligíbugiñe, ába marijínjali lan. ¹² Ába naríjiniña jiláguaaña, weínamujaña jáma ñúbürigiña rára ligíbugiñe Búngiu, ába tadárawagún líburu buri túma ábanya líburu to líburu to lánina ibágari. Ába jagúserawagüdún jiláguaaña luágu buri cátei lé meja jadúgübei, según le bürúwañubei tídan líburu buri tugúya. ¹³ Sarátiña sun ja añáradagubaña dúnarugu, sun ja jiláguañabaña, ába jásaarun lídaangiñe óúweni, ába jagúserawagüdún luágu buri cátei lé meja jadúgübei. ¹⁴ Ába lágurúniwa óúweni lúma jabára jiláguaaña lídoun lagúnu le láubei wátu geméti. Lagúnu láuti wátu geméti ligía, ligía libámabei óúweni, ¹⁵ ñíjin jagurúa ja úabei jíri tídan líburu to lánina ibágari lun jasúfurirun ñi gumúgua dan.

21

Iséri siélu lúma iséri ubou

¹ Lárigiñe, ába layáwadagun iséri siélu lúma ában iséri ubou nun, gumúgua buga furúmiñeti siélu lúma furúmiñeti ubou áni úaali buga barána. ² Áu Juan, aríja numúti ubúругu biníwati le iséri Jerusalén, larárirun siéluigiñe lúmagiñe Búngiu. Aráanseñu líña quei ában

adári dáüguañu lubá tadári. ³ Ába nagáambun laríñagun ában umálali jéreti siélugiñe.

—Aríjabá, agánawati Búngiu jádan güriña guetó. Laganoúba jáma, jagíaba lánigu, Búngiu mémeba jáma lun ligía lan Jabúngiute. ⁴ Larágajabei sun jáguira, úaalíme ouweni ni ayájuni ni íruni ni igárigu, ladúga sügúja sún meja cátei le níjeinbei.

⁵ Ábati laríñagun Búngiu.

—Aríjabá, adúga numúti sun cátei isérime.

Aríñagati gíñe.

—Babúrüja, ladúga inárüniti dimúrei buri le, áni gayáraati lafíñerún luágu.

⁶ Lárigiñe, ába laríñagun nun.

—Súnja nadúgüni sun cátei le. Áu lagúmesejabei sun cátei, áu gíñe lagúmujoúnbei, quei létüra ‘A’ lúma ‘Z’. Le mágürabuti, níchuguba lun lun látun lídaangiñe líseesen dúna le íchugubei ibágari, mafáyeijaanga luagu. ⁷ Ja ásiiragúbalin wuríbani jerésibirubei sun le lúnbei jabíjini quei jalágaante quei nirájüñü, áume Jabúngiute, jagíame nirájüñü. ⁸ Ánjañati ja janúfudebaña, ja mafíñebaña, ja iyéreejabúbaña, ja gáfarajadibaña, ja adáagubaña salúfuri, ja abíñarajabaña, ja ájuduragubaña joun sándu, jáma ja yéebaña, jágurúba lídoun lagúnu le súbai láu wátu geméti lúma sáfuru, le libíamabei ouweni, ligíaba jalágaante.

Iséri Jerusalén

⁹ Ábati liábin ában jádaangiñe sédü ánjeligu ja láubaña sédü cópu buin jáu sédü jagúmujoún ígei, ába laríñagun nun.

—Jigábu, narúfudaali jageíra lánigu Jesucrístu bun.

¹⁰ Ába layáwadaguagüdüni Sífiri Sándu ában wúbü nun, weíruti, íñu, ába larúfuduni ouwenbun ubúrugu

biníwati le Jerusalén nun, larárirun siéluigiñe lúmagiñe Búngiu. ¹¹ Ámirijati ubúrugú ligía láu larúgounga Búngiu, ítara líña límirin quei límirin ában dúbü buídumeraüti, quei dúbü le jáspe, jarúgoungati quei bídiriu. ¹² Níñein ában baríeru weíríti, íñu, láu dúusu béna geyégu láu ubúrugú ligía, ában ánjeli luágu cáda béna, lúma jíri dúusu túrību ladúgawagun Israél bürúwañu luágu buri béna. ¹³ Úrüwañein béna lueígiñe le ñígiñe lubeí laboucha wéyu, úrüwa lueígiñe nóрте, úrüwa lueígiñe sur lúma úrüwa lueígiñe oubaü le ñígiñe lubeí lálüda wéyu. ¹⁴ Baríeru ligía, ligíbuaguñein dúusu dúbü lidérebuguñein, láu jíri dúusu láni Crístu apóstolugu bürúwañu luágu.

¹⁵ Níñein ában mabúru gólu lúma ánjeli le adímure-jabei núma lun lamísurajani ubúrugú, lubéneri, lúma lubárierun. ¹⁶ Ubúrugú ligía, ába lábu lidábuberen lúma limígifen. Ába lamísurajani ánjeli ligía ubúrugú láu lumáburu, bián-mílu bián-san kilómetros luweírín, ába lábu limígifen lúma líñun, lúma lidábuberen. ¹⁷ Lárigiñe, ába lamísurajani baríeru, úrüwa-wein-gádürü métros luweírín según jamísuraagüle gürígia le layúsurubei ánjeli ligía.

¹⁸ Láu dúbü le jáspe ladügúwa baríeru ligía, ubúruguti ligía, láuti gólu le tímatimaati, miríti queísi bídiriu le jarúmati. ¹⁹ Wéndegüdáwati lébu baríeru ligía láu sun luwúyeri dúbü buíduburiti. le furúmiñeti, láu jáspe, le libíaman, láu saffro, le lúrüwan, láu ágata, le ligádürün, láu esmerálda, ²⁰ le liseíngün, láu ónise, le lisisín, láu cornalína, le lisedün, láu crisólito, le liwídün, láu berílo, le linéfun, láu topásio, le lidíisin, láu crisoprása, le liúnsun, láu jasínto, léti lidúusun, láu amatísta. ²¹ Dúusugubei béna ligía, dúusu pérlas, cáda béna láu ábanrügü pérla

ladügúwa. Léti úma buri lání ubúругu ligía, láuti gólu jarúgoungati quei bídiriu.

²² Maríjintina ni ában ligílisi lídan ubúругu lídan, ladúga añájein Wabúreme Búngiu le Súnti Gabáfu lúma Jesucrístu ñi, mabúseerúnwatu ligílisi le ñí jabei. ²³ Memégeirunti ubúругu ligía larúgounga lúmagiñe wéyu ni lúmagiñe játi, ladúga le guánarü larúgounga Búngiu rúti larúgounga lun, léti Jesucrístu, ligía lilámpunbei ubúругu ligía. ²⁴ Jeíbuguba sun néchaanigu ja sálbawañabaña lídan lilámpun ubúругu ligía, ábame janúgüni lurúeitegu ubouú jaweírigun ñíjin, lun jíchuguni lun Búngiu. ²⁵ Madáurawagunbei lubéneri wéyuagu, úabei gíñe áriebu ñi. ²⁶ Lanügúba jaweírigun néchaanigu ñíjin, láu sun jarísín, ²⁷ mebélubei ni cáta wíyeti ñíjin, ni le adúgüti cátei le wuríbati o gayéeraguati. Ja rügúbaña bürúwañubaña íri tídan líburu to lánina ibágari to lúmaboun Jesucrístu, jagía rügúbaña ebélura.

22

¹ Ábati larúfudun ánjeli ligía ában dúna jarúmati nun, le íchugubei ibágari, jarúgoungati quei bídiriu, lídaangiñe lála Búngiu lúma lála Jesucrístu láfurida. ² Ñíñein dúna ligía lamídaangua lémeri ubúругu ligía, áni luágu bián louba dúna ligía ñi laweírida buri tídíbu wéwe le íchugubei ibágari, le agíndubei dúusu weíyaasu lídan irúmu. Ságü játi lagíindun, léti lubána, seríwiti lun lagáranijouún joun néchaanigu. ³ Úaalíme ni cáta ñi lun lábugiñe lan líñaragun Búngiu. Ñíbei lála Búngiu lúma lála Jesucrístu lídan ubúругu ligía, ábame jájuduragun lánigu lun. ⁴ Jagágibudaguba lúma Búngiu, ñíbei gíñe líri jeréberugu. ⁵ Úaalíme áriebu ñi, ja aganoubaña ñi, memégeirunbaña ligémeri lámpu ni

ligémeri wéyu, ladúga larúgoundagadüba Wabúreme Búngiu jáu, ábame jagúmadijan sun dan.

Madíseeli líabin Jesús

⁶ Lárigiñe, ába laríñagun ánjeli ligía nun.

—Inárüñiti dimúrei buri le, áni gayáraati lafíñerúniwa luágu, áni Wabúreme Búngiu méme le íchugubei dimúrei joun profétagu oúnaja láadina lun narúfuduni le lúnbei lasúseredun joun lánigu madíse.

⁷ —¡Aríja jumá! ¡Anáte madíse! líña laríñagun Jesucrístu.

¡Gúndaalá le adúgübei gásu láu ugánu le lání Búngiu le bürúwañubei tídan líburu to!

⁸ Áu Juan, agáamba numúti, aríjaneí buri cátei le, áni lárigiñe naríjini lúma nagáambuni, ába nájuduragun lubádu lugúdi ánjeli le arúfudubalin nun. ⁹ Ába laríñagun nun.

—Madúgabei le, esériwiduti lun Búngiu áu quei amúrú jáma bibíriña ja profétagu, jáma sun ja adúgübaña gásu láu le bürúwañubei tídan líburu to, lun Búngiu lun bájuduragun.

¹⁰ Aríñagati gíñe nun.

—Marámudabei lání Búngiu ugánu le bürúwañubei tídan líburu to ladúga yaráfaali dan lun lagúnfulirún.

¹¹ Ígirabei le wuríbabei lun lasígirun adáagua wuríbani, le wíyebai, lun lasígirun lídan liwíye, ánjeinti le buídubei, buídumemelá, áni le wügúri le derégeguabei lúngua lun Búngiu, gúnfulimemelá.

¹² —Ánja, madíseeli niábin, líña laríñagun Jesucrístu, áni barú numuti afáyeiruajaü le lúnbei níchuguni lun cáda ában según buri cátei le ladúgübei. ¹³ Áu furúmiñetibei lúma agúmujoúni, lagúmeseja sun cátei lúma lagúmujoún quei létüra 'A' lúma 'Z'.

¹⁴ Gúndaatiña ja achíbubalin jafígoun lun garícha jamá lun jeígin lídaangiñe lin tídibu wéwe le íchubei ibá-gari, gayára lámuga jebélurun lueígiñe lubéneri ubúругu.

¹⁵ Ánjaña ja mafíñeradibaña luágu Jesucrístu, ja abíñara-jabaña, ja adáagubaña salúfuri, ja gáfarajadibaña, ja ájuduragubaña joun sándu, jáma sun ja jínsiñejabúbaña lun eyéeraguni, jeréderuba bougudi.

¹⁶ —Áu Jesúsu, oúnaja náali náni ánjeli lun lasúbudi-ragüdüni sún buri cátei le joún buri tílana ligílisi. Áu linébaanfan urúei David, áu gíñe queísi warúguma to lánina bináafin.

¹⁷ Aríñagati Sífiri Sándu jáma ja lánigubaña Jesucrístu.

—Jigábu lun Jesucrístu lun basálbarun.

Le gíñe agáambubei, aríñagalá.

—Jigábu lun Jesucrístu, sálba bámuga.

Le mágürabubei, ánjein busén, nńbinlá, gurála lí-daangiñe dúna le íchugubei ibágari, mafáyeijaanga luágu.

¹⁸ Sun ja agáambubalin láni Búngiu ugánu le bürúwañubei tídan líburu to, wéridi numútiña lueí cátei le. le íchuguti lánwoun cátei le, lagánwoundagüdübaña Búngiu ígei ja uágubaña labúrújoúa tídan líburu to, luágu.

¹⁹ Le gíñe agídaruti som cátei lídaangiñe láni Búngiu ugánu le bürúwañubei tídan líburu to, lagídarubei gíñe lufánran lídaangiñe lin tídibu wéwe le íchugubei ibágari, lúma lídaangiñe ubúругu sándu lé buri bürúwabei uágu tídan líburu to.

²⁰ Le asúbudiragüdübalin buri cátei le, aríñagati.

—Ánja, madíseeli niábin.

Ítaralá. ¡Jigábu Wabúreme Jesúsu!

²¹ Binílaün Wabúreme Jesucrístu sun jugúya. Ítaralá.

Lerérún Búngiu To Lánina Iséri Darádu New Testament in Garifuna (HO:cab:Garifuna)

copyright © 2012 Wycliffe Bible Translators, Inc.

Language: Garifuna

Translation by: Wycliffe Bible Translators, Inc.

Garifuna [cab], Honduras

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

- You must give Attribution to the work.

- You do not sell this work for a profit.

- You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Garifuna

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

- You include the above copyright and source information.

- You do not sell this work for a profit.

- You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25
